

सुनतहिरणकश्यप गुरुवानी । बैठायो निज अंकहि आनी ॥
 कहेहु कइहु सिखयो गुरु जोई । हमरेहु सुनन लालसा सोई ॥
 तब प्रल्हाद कह्यो सुसकाई । जय रघुनाथ राम रघुराई ॥
 गुरु गिरावत म्बहिं भवकूपा । कैसे गिरहुँ जानि मैं भूपा ॥
 जिनके उर न रामपद प्रीती । ते नहिं जानत नीति अनीती ॥
 कुमतीं करहिं मनोरथ नाना । स्वप्नसरिस सो सकल विलाना ॥

दोहा—सुख संपति अरु साहिबी, बिनाभजे रघुनाथ ॥

मिटत वारिबुल्ला सरिस, मरे न लागत हाथ ॥ ८ ॥

सुनत पुत्रकी अनुपम वानी । कोपित भयो असुर अज्ञानी ॥
 पटक अंक ते बालककाहीं । बोल्यो वचन कठोर तहाँहीं ॥
 रेसुत शठ यह कौन पढ़ायो । तासुनाम नहिं मोहिं बतायो ॥
 मेरो लघुभ्राता वधकारी । ताहि भजत भय छोड़ि हमारी ॥
 कबहुँ राम हारे जो मुख कहिहै । जीवनघात आसु तै लहिहै ॥
 मोहिं डरि जो कछु रह्यो लुकाई । ताहि लियो तैं नाथ बनाई ॥
 लै गुरु जाहु भवन शिशु काहीं । कहन न पावै हरि मुख माहीं ॥
 अब जो कही दंड मैं दैहौं । पुनि नहिं बालक मानि बचैहौं ॥
 कह प्रल्हाद सहज विनभीती । सुनहु पिता याकी असरीती ॥
 इंद्रिय सबहै जीव अधीना । जीवनाथ रघुनाथ प्रवीना ॥
 सहज ईशकर दास अनीशा । जपत हरिहि सुनु दानवईशा ॥
 यामें कछु मोरा नहिं दोषू । जनक करहु तुम नाहक रोषू ॥

दोहा—जो जानै यह भेदको, तो तेहि जगत हेराइ ॥

जो नहिं जानै भेद यह, ताहि नजगत सिराइ ॥ ९ ॥

सुनत कुपित कह शठ अस वानी । मोहिं सिखवत विज्ञान अज्ञानी
 टारहु मम दृगपथ यहि काहीं । नातो मीचु होत क्षणमाहीं ॥
 तब गुरु गहिकर भवन सिधारे । तेहि बुझाइ अस वचन उचारे ॥

निजकुल धर्म तजहु नहिं ताता । जैहै विगरी बनी सब वाता ॥
 कह प्रल्हाद मोर नहिं विगरी । तुम देखहु निज विगरी सिगरी ॥
 गुरु सकोप तब पुनि नृप पाहीं । कह्यो आय शिशु मानत नाहीं ॥
 तुरत असुर प्रल्हाद बोलायो । बारवार दृगलाल देखायो ॥
 दियो भटन कहँ हुकुम सुरारी । गजदंतन शिशु डारहु मारी ॥
 सुनि भट तुरत पकरि प्रल्हादै । ठाढ़कियो चौहट करिनादै ॥
 महामत्त मातंग मँगाई । दीन्हो सन्मुख तासु चलाई ॥
 दंती दंत दियो उरकैसे । दंड एरंड पषाणहि जैसे ॥
 टूटे रद करि रव मुख मोरा । प्रल्हादहि सुख दुखनहिं थोरा ॥
 दोहा—अचरजमान्यो असुर सब, धाय हन्यो तेहिशूल ॥

टूटिगये सब लोहलगे, जैसेमूलकमूल ॥ १० ॥

पुनि सब असुर कोप अतिकीन्हे । बांधि तुरत प्रल्हादहि लीन्हे ॥
 कहे सकल धरणी खनि डारो । गाड़िदेहु यहिविधि यहिमारो ॥
 खनिकै गहिर गर्त तेहिकाला । डारयो कुँवरहि असुरकराला ॥
 तोप्यो उपर मृत्तिका भूरी । दियो पषाण उपरते पूरो ॥
 मरिप्रल्हादगयो असजाने । सोये रैन सुचित सुखमाने ॥
 देखनहेतु भोरलहि पैठे । निरखे प्रल्हादहि तहँवैठे ॥
 असुर सबै तब अचरज माने । विस्मय हर्षहीनतेहि जाने ॥
 पुनि प्रल्हादहि सकलसुरारी । लैनिजसंगहि चले सिधारो ॥
 रह्यो येक गिरिशृंग उतंगा । दीन्हो ताहि चढ़ाय उछंगा ॥
 बहु योजनकी रही उँचाई । तहँते दिय हरिजनहि गिराई ॥
 दैकरताल मरो तेहिमानी । हरि चरित्र शठ कोउ नहिंजानी ॥
 भैमहिफूल तूलके तूला । हरिप्रभाव सपनेहुँ नहिंशूला ॥
 दोहा—देखि अछत असुरेश सुत, अचरज असुरविचारि ॥
 लगे कहन यहिभाँतिसों, केहिविधिडारियमारि ॥ ११ ॥

सकलअंग पुनिजकरिजँजीरा । डारचो नीरधि नीर गँभीरा ॥
 सागर तेहि तरंगमहँ लीन्हो । मंदमंद तटमहँ धरिदीन्हो ॥
 यंह विधि किये अनेक उपाई । हरिजन मरण हेतु बरियाई ॥
 पै न विथा नेकहु तनुव्यापी । राख्यो निजकर कृष्ण प्रतापी ॥
 जिहि रक्षत जगमें भुजचारी । द्वैभुज सकत ताहिकिमिमारी ॥
 असुर ल्याइ दानवपाति आगे । लजितवदन कहन असलागे ॥
 कौनहु विधि शिशुमरै न मारा । काहकरिय अब नाथ विचारा ॥
 कह्यो दैत्यपति वारुण पासा । बाँधिजाहु लैगुरुके पासा ॥
 सुधरै शठ सब विधि नहिँतबलों । आवै गुरू न भार्गव जबलों ॥
 शठ प्रल्हादाहिँ तैसाहिँ कीन्हे । गे गुरुभवन ताहिँसँगलीन्हे ॥
 वारुण पाशहिँ अंगन बाँधी । राख्योताहिँ कोठरी धाँधी ॥
 गुरुको अंतर लहिँ प्रल्हादा । बोलि बालकन कियसंवादा ॥

दोहा—लखहु कृष्ण परभाव अस, म्वहिँ मारनके हेत ॥

कीन्हे असुर उपाय बहु, पै न लग्यो कछुनेत ॥१२॥

तुमहुँ जो कृष्णभक्ति असकरिहौ । कबहुँनकालपाशमें परिहौ ॥
 बालक लखि प्रल्हाद प्रभाऊ । सत्यमानि भे मृदुलस्वभाऊ ॥
 राम कृष्ण मुखभाषण लागे । गुरुके वचन त्यागि भयत्यागे ॥
 षंडामर्क फेरि तहँ आये । लखि बालक दृगलाल दिखाये ॥
 जर्ति बरत भूपति ढिग जाई । कह्यो नाथ रावरी दुहाई ॥
 अबहुँ नमानत बालक पापी । राउरत्रास नेकु नहिँ व्यापी ॥
 सुनि सुरारि भो तामसरूपा । लोचन प्रलयानल अनुरूपा ॥
 कह्योपुत्र पापी प्रल्हादू । पढ़ेअवशि यह जालिम जादू ॥
 विविधभांतिते मरे . नमारा । ताते मैं असकियो विचारा ॥
 बोलि सभामधि अपने हाथा । लै करवाल काटि हौँ माथा ॥
 जाहु ले आवहु खल सुत काहीं । अब विलंब कीजै क्षणनाहीं ॥

असुरअधिपके सुनि असवैना । धाये भट. आये गुरुऐना ॥

दोहा—पकरितुरत प्रल्हादको, ल्याये सभामझार ।

सहज सुभाव गोविंद जन, नहिं कछु हर्षखँभार १३॥
बोल्यो हिरणकशिपु विकराला । बालकआइगयो तुव काला ॥
की मेरो अब शासन मानै । की यमपुरको करै पयानै ॥
करि छल वची बहुत दिन काया । अबनहिं लागी राउरि माया ॥
हो जो तुव प्रभु ताहि बुलावै । देखौं केहि विधि तोहिं बचावै ॥
करिसि दुष्ट जाको गुण गाना । सो मेरो रिपु छली महाना ॥
करि छल हरचो मोर लघुभ्राता । मोहिं डरिदुरचो न कहूँ दरशाता
व्यापित जग भरोस अस तोको । क्योंनहिं दरशावत इत माँको
नाचत काल तोर तुव शीशा । आइ न कसरक्षत तुव ईशा ॥
सुमिरु सुमिरु अपने प्रभुकाहीं । जियनउपायराखअब नाहीं ॥
तब सहजहि हँसिकह प्रल्हादा । पितातोहिं भो अति उनमादा ॥
केहि सुमिरों अरु काहि बुलाऊँ । मोप्रभुतौ दीसत सब ठाऊँ ॥
असकौनहुँ थल पितुनहिं दीसा । जहँ नहिं मोहिंदीसत जगदीशा ।

दोहा—जो समता जगमें करौ, है अनन्य हरिदास ।

तौ तुमहूँको लखि परै, सबथल रमानिवास ॥ १४ ॥

कवित्त—सुनि प्रल्हाद वाद कोप मर्याद मोरि परमप्रसाद
भरो नाद करि बोल्यो वैन ॥ भल यह बात कही चली नाहिं
तोरो छल छली विष्णु होइबली रोकै गली कोऊहैन ॥ रघुराज
सकल समाज मध्य भाषों आज देव शिरताज तेरी लाज काज
आवै क्यों न ॥ शुंभ औ निशुंभ जंभ जोरदार वीर बीच पारि-
हरि दंभ काहे खंभहीते प्रगटैन ॥ १ ॥ असुरकुमार कियो वि-
हँसि उचार ऐसो हेरचो बारबार होन हेच्यो असठोर है ॥ जहाँ
नदेखायो मोहिं करुण समुद्र छायो अति मनभायो रूप देवकी

किशोरहै॥रघुराज रसा दिवि निशा दिन दिशा वसु खाली नाख
 रारि सो विचार असमोरहै ॥ करि अनुकंपाको अरम्भ यह खं-
 भंहीमें दीसतहै ईश मोहिं कैसो ज्ञान तोरहै ॥२॥ सुनि प्रल्हाद
 बैन धर्म मर्यादभरे नाकि मर्याद कोप कीन्हो असुरेशहै॥घोरसोर
 कैकै भरिदीन्हो महि चान्यो वोर उम्यो अतिजोरकै कँपायकै
 निवेशहै ॥ फरके उदंड दोरदंडजे अखंड वोज अमित घमंडभो
 प्रचंड कालवेशहै ॥ त्रासदै निदेश नखतेश अमरेश हूको मान्यो
 दुष्टि मुष्टि मध्यखम्भके प्रदेशहै ॥ ३ ॥ मुष्टके हनत हेम कश्य
 पके खम्भमध्य निकसी अवाज गजराज कोटिगाजकी॥ डोलउठे
 गिरिराज बोलिउठे गजराज असुरसमाज भाजसुधतजिलाजकी॥
 मुरगो मिजाज त्योंहीं दुरिगो दराज वोज बाजभई वीरताहू दै-
 त्य शिरताजकी ॥ उछल्यो उदधिराज विछल्यो ग्रहनराज ध्या
 नकी धमारि भूरि भूली भूतराजकी ॥ ४ ॥ राखत सुपंथनको
 माषत कुपंथनपै रघुराज भाषत अनंद जग छायो है ॥
 दरत सुरेश दुखहरत खलेश सुख पूरण करत सबसंत चित्तचा
 योहै ॥ दीननपै दायाको देखावत दुनीमें तेज छावत दिशानन
 में आननको भायो है ॥ दास प्रह्लादको विश्वासको बढ़ावत
 तुरंत फारि खंभको नृसिंह कटिआयोहै ॥५॥ पक्ष सितवार शनि
 आर्ध सौंझ चौदशिको दुष्टदलदीह वारि बुल्लासों बिलाइगो ॥
 धाई धाक धूलो जय सोर नाक भूलो मचो सुर उर आनंद उद
 धि उमगाइगो ॥ रघुराज ब्रह्मा बैन सत्यहेतु अंधकारि फारिकै
 उदर हरि शोणित अन्हाइगो ॥ दुतही दलानमें दिगीशनके
 देखत दराज दैत्यराज वीर दीपसों बुताइगो ॥ ६ ॥

दोहा—दासकाज यदुराजप्रभु, धारिरूपमृगराज ।

मारचो असुरदराजको, सारचोसवसुरकाज ॥ १५ ॥

बैज्यो सिंहासन मधिजाई । ज्वालामाल दिशानन छाई ॥
 सकत नकोउ नरहरि कहँ देखी । भयो भयावन रूप विशेषी ॥
 लै सुर भागे सकल विमाना । सहिन सकें प्रभुतेज महाना ॥
 कह्यो विरंचि रमाकहँ आई । निजपतितेजशांति करुजाई ॥
 रमाकह्यो अस प्रभुकर रूपा । देख्यो सुन्यो नकवहुँ अनूपा ॥
 नहिँ जैहँ यहिकाल समीपा । निरखि भयावन रूपप्रतीपा ॥
 विधि तब कह प्रह्लाद बुझाई । करहु शांति प्रभुको तुमजाई ॥
 नातो जरन चहत सबलोका । उपज्यो अति सबकेउर शोका ॥
 तब प्रह्लाद मंद मुसुकाई । सहज अभीत समीप सिधाई ॥
 लाग्यो अस्तुतिकरन नाथकी । सन्मुख अंजलि जोरिहाथकी ॥
 नरहरि लियो अंक बैठाई । शीश सँधि दृगवारि बहाई ॥
 निज रसनासों चाटत जाहीं । चूमतमुख करुणामिति नाहीं ॥
 दोहा—पुनितेहि दानव अधिपकारि, सौँपि सुरन सुरथान ॥
 दास विश्वास दिखाइ अस, भे हरि अंतर्ध्यान ॥ १६ ॥
 इति श्रीरामरसिकावल्यांसतयुगखंडेअष्टमोऽध्यायः ॥ ८ ॥

अथ यमराजकी कथा ॥

दोहा—अब वर्णौ यमराजकी, कथा मनोहर जोई ।

जाहि सुनत जन पातकी, तजहिँ कुमति सबकोई ॥ १ ॥

मनु सनकादिक देवऋषि, मैथिल कपिल स्वयंभु ।

बलिभीषम प्रह्लाद शुक, धर्मराज अरु शंभु ॥ २ ॥

महाभागवत द्वादश माहीं । लिख्यो वेद यमराजहु काहीं ॥

ताते यमकी कथा बखानो । अहै अनेक प्रसिद्ध पुरानो ॥

नेसुक कहौं तासु मैं गाथा । धरि हरिभक्त पद्मपद माथा ॥

द्राविड़ देश सुयज्ञ नरेशा । बाढ़े तासु शत्रु बहु देशा ॥

कियो युद्ध भूपति कहँ गेरी । मारुमची दुहुँओर घनेरी ॥
 राजा वीर धीर अति रहेऊ । समर बीचसों मीचुहि लहेऊ ॥
 तासु तनय तिय अरु परिवारा । भूप मरन सुनि करत पुकारा ॥
 रोवत समरभूमिमें आये । नृपशरीरलखि अतिदुखपाये ॥
 मच्यो यहा तहँ आरत सोरा । काहुके तनु सँभार नहिँ थोरा ॥
 देखि दशा तिनकी यमराजा । भक्तिमानभे दया दराजा ॥
 सहि नसक्योदुख तिनकर देखी । द्रुत दिल द्रयो अपन असलेखी
 भयमानिहँ प्रगट जो जाऊँ । तातेवपु छिपाइ समुझाऊँ ॥

दोहा—असविचार यमराजतहँ, धरि बालकको रूप ।

आये संगरमेदिनी, पच्यो मृतक जहँ भूप ॥ ३ ॥

कह्यो कौन हित करहु विलापा । मोरेजान वृथा संतापा ॥
 जियहि जो रोवहु मरेहु सोनाहीं । जो तनुहित तौ परचो इहाहीं ॥
 जो रोवहु मनमानि वियोगू । तौ बहुवार वियोग संयोगू ॥
 जेहिहरि राखत सो वनमाहीं । हरणहार ताको कोउनाहीं ॥
 जापै रूठत रमानिवासू । कुलिशकोठरिहु तासु विनासू ॥
 ताते वृथा करहु दुखभारी । मोहलेहु दुखहेतु विचारी ॥
 तजे मोह सुख दुख नहिँव्यापत । कौनिहुँताप न तनुमहँतापत ॥
 मोहिँ घरके निकासि सब दीन्यो । तबतेमैं सुख दुख नहिँभीन्यो ॥
 बाघ वृका मोहिँ सके नखाई । फिरोँअभयवन नगर सदाई ॥
 यहिप्रकार बहुविधि समुझाई । सबको दियो कलेशमिट्टाई ॥
 नगरनारि नर निज घर आये । मोहत्यागि हरि पद चितलाये
 ऐसी परिभक्तनकी रीती । परदुखमेटहिँ करि अतिप्रीती

दोहा—परदुखमें अतिशय दुखी, परसुखमेंसुखवान ।

निजदुखसुखकछुगणतनहिँ, जे हरिभक्तप्रधान ॥ ४ ॥

इति श्रीरामरसिकावल्यांसतयुगखंडेनवमोऽध्यायः ॥ ९ ॥

अथ कृष्णकेजयविजयपार्षदोंकी कथा ॥

दोहा—षोडशपार्षद कृष्णके, जय अरु विजय प्रधान ।

तिनकी मैं कछु कहतहौं, कथा संत सुखदान ॥१॥

एकसमय सनकादिक चारी । गे विकुंठ जहँ बसत मुरारी ॥
समय शयन जय विजय विचारी । रोक्ख्यो मुनिन छरी करधारी ॥
हरिप्रेरणवश मुनिकर कोपा । दीन्होंशाप मोदकरि लोपा ॥
जोरि पाणि दोउ किये प्रणामा । शिरधर शापलई मतिधामा ॥
तनक भयो तनुमें नहिं रोषा । दीन्हो तनक न तपस्विन दोषा ॥
असुर निशाचर नृपत्रय जनमा । पावतभये परमदुख तनमा ॥
शापदेनमें यदापि समर्था । तदापि भयो मानहु असमर्था ॥
यहीरीति हरिदासन केरी । तकै नसाधु बंक दगहेरी ॥
कोपेहु साधुक्षमै सबकाला । दोषहुदेहि न दीनदयाला ॥
क्रोध कटेनहिं कौनेहु रोमा । तौ पुनि कहँ ज्वानी करजोमा ॥
यदापि कह्यो सनकादि बहोरी । भेटहुशाप मोरि यहि खोरी ॥
जै जय विजय नकछु उरलाये । धन्योशीश जो प्रथमहिं गाये ॥

दोहा—कृष्ण पार्षदकीकथा, और अनंत पुराण ॥

अतिविस्तर भय ग्रंथते, मैं नहिं कियोवखान ॥ २ ॥

इति श्रीरामरसिकावल्यसंतयुगखंडेशमोऽध्यायः ॥ १० ॥

अथ श्रीलक्ष्मजीकी कथा ॥

दोहा—अब वर्णौं कमला कथा, प्रथित पुरातन माहिं ।

जो मानत निज पुत्र सम, सब हरि दासन काहिं ॥१॥

एक समय हरि निकट सोहाई । बैठी रही रमा सुखदाई ॥
कलि आगम देख्यो जगमाहीं । किमि उधार है है जनकाहीं ॥
अस गुणि उर उपजी अतिदाया । कह्यो कंत हे कृपानिकाया ॥
जगमें जेहि विधि जीवउधारा । कहहु नाथ मोहिय दुखभारा ॥

हरिकह कोउकोउकलियुगमाहीं। मोहिं भजिहै ऐहै मोहिं पाहीं॥
 हैं नै नास्तिक अधम अपारा। तिनको नहिं छूटी संसारा ॥
 करहु यतन जो तव मनभावै। जामें जीव निकट मम आवै॥
 पाति शासन सुनिअतिमुदमानी। विष्वक्सेन निकट निजआनी
 दियो ताहि शरणागत मंत्रा। कहेहु उधारहु जनन स्वतंत्रा॥
 सो शठ कोपहिं कियउपदेशा। श्री संप्रदा चली शुभवेशा ॥
 तवते श्रीवैष्णव कहवाये। जिनहिं जोहिं यम दूर पराये ॥
 तरे तुरत तरिहैं बहुजीवा। श्रीसंप्रदा पाय सुख सीवा ॥
 दोहा—कोकृपालु कमला सरिस, जनन उधारन हेत ॥
 प्रगटि आपनी संप्रदा, कियो मुक्ति कर नेत ॥ २ ॥
 इति श्रीरामरसिकावल्यांसतयुगखंडएकादशोऽध्यायः ॥ ११ ॥

अथ गरुड़जीकी कथा ॥

दोहा—हरिवाहन विहंगाधिपति, तासुकथा अवयेकु ॥
 मैं वर्णहुँ अति माधुरी, प्रथित पुराण अनेकु ॥
 एकसमय हरिदीन दयाला। लखि नाशत जीवन कहँ काला॥
 भई दया कहँ गरुड़हि आनी। करहु यतन जीवहिं चिरप्रानी ॥
 जीहैं सुधा पाइ चिरकाला। असविचारि खगनाथ उताला ॥
 सुधाहिरण हित गयो पताला। अहि सहाय हित गो सुरपाला ॥
 पन्नग गंधर्व सुरहु मुरारी। किय सब मिल खगपतिसों रारी॥
 खगपति येक सकल कहँ जीती। लयायो प्रथित पियूष अभीती ॥
 पन्नगारि कह अजय विचारी। सुरहु असुर सब निकट सिधारी॥
 जीवन जियन हेतु चिरकाला। सुधा हन्यो बल बुद्धि विसाला॥
 देहु हमहिं खैहैं सब बाँटी। यह चिरकाल जियन परिपाटी॥
 दयालागि खगपतिसों दीन्हो। करि प्रणाम सुर असुरहु लीन्हो॥

देव असुर बांटन जब भाषे । हेति प्रहेति असुर दोउ भाषे ॥
सुधाकलश लै क्षीरधिवोरचो । करि रण देवनको मुख मोरचो ॥

दोहा—जीति सुरा सुर हरि सुधा, परहित दियो खगेश ॥

हरिदासनकी रीति यह, जीवन द्रवहि हमेश ॥

इति श्रीरामरसिकावल्यांस्ततयुगखंडेद्वादशोऽध्यायः ॥ १२ ॥

अथ ध्रुवकी कथा ॥

दोहा—श्रीध्रुव धरा अधीशकी, वणौ कथा विधान ॥

रीझि गये षटमासमें, जापर श्रीभगवान ॥

भयो चक्रवर्ती महाराजा । नाम उत्तानपाद सुख साजा ॥
अहै प्रियव्रतको लघुभाई । राज्यकियो पथ धर्म चलाई ॥
भूपतिके सुंदर द्वैरानी । सुरुचि सुनीति नाम छविखानी ॥
सुरुचि तनय उत्तम असनामा । सुत सुनीतिको ध्रुव मतिधामा ॥
सुरुचि सोहागिनि रही नरसै । नहि सुनीतिपर प्रीति विशेसै ॥
एकसमय नृप विशद अगारा । सचिव समेत बैठ दरबारा ॥
सुरुचि सुवन उत्तम तहँ आयो । नृप सह मोद गोद बैठायो ॥
इत सुनीति निज सुवन बोलाई । करि मज्जन भूषण पहिराई ॥
पहिरायो पुनि वसन रँगिला । दीन्हो भाल डिठौना नीला ॥
छोटि ढाल छोटी तरवारी । छोटधनुष अरु छोटि कटारी ॥
सुतहि साजि यहि भाँति पठायो । ध्रुव दरबार पिताके आयो ॥
किय प्रणाम चलि चटक तहाहीं । पिताअंकलखि उत्तम काहीं ॥

दोहा—बैठन हित पुनि चलत भो, आयहु पितुके अंक ॥

पंचवर्षको बाल ध्रुव, नोखो निपट निशंक ॥ १ ॥

कह्यो सुरुचि करि अरुण विलोचना बैठहुमति पितु अंकसकोचन
जन्मलियो नहि उदर हमारे । जनक गोद नहि बैठन हारे ॥

मेरे उदर जन्म जो लेइत । तौ हम बैठनको कहि देइत ॥
 तपकरि मोर पुत्र तुम होहु । जनक अंक कहैं तव अवरोहु ॥
 सुरुचि वचन ध्रुव हृदय विशाला । भये कुलिशसम द्रुतहि दुशाला
 फिरयो तुरत जननी ठिग आयो । रोवनलग्यो महादुख छायो ॥
 जननी कह्यो वत्स कस रोवहु । अपनो दुखमोसों नहिं गोवहु ॥
 कहे बाल सँगके खिलवारी । सुरुचि जौन विधि वचन उचारी
 अतिकलेस भरि कह्यो सुनीती । पुत्र करहु रघुपति पद प्रीती ॥
 जो न अभागिनिके सुत होते । तो काहे दुख पौतेहु ओते ॥
 विनहरि कोउनहिं संकटनासी । भजहु जाइ सुत अवधविलासी ॥
 जननि वचन सुनि ध्रुवततकाला । निकसिचल्यो सुमिरत नँदलाला

दोहा—जब आयो पुरवाहिरे, दशा देवऋषि देखि ॥

आय कह्यो ध्रुवसों वचन, अति अचरज चितलेखि २॥

रेवालक घर तजि कहैं जाता । कहहु सत्य जीकी सब बाता ॥
 ध्रुव सिंगरो वृत्तांत सुनाई । बहुरि कह्यो भजिहों यदुराई ॥
 नारद कह्यो बिहँसि रेवालक । विपिनजीवबहु मानुषवालक ॥
 कृष्णभक्त नहिं सहजहिं होई । कोटिनमहँ निवृत्ति कोइकोई ॥
 सहजहिं मिलीहँ नयदुकुलपालक । वीतत भजत जन्म बहुवालक ॥
 वृथा वैस नृपसुवन गमावै । यह प्रण छोड़ि लौटिघर जावै ॥
 सुनिमुनिवचन कह्यो नृपनंदन । मुनिवर कृपासिंधुयदुनंदन ॥
 की रघुपति पद दुर्लभ दैहै । की अब प्राण अवशि ममलैहै ॥
 बात तीसरी अब न मुनीशा । आज्ञादेहु धरो पदशीशा ॥
 बालकवचन सुनत मुनिराई । गद्गद कर दृग वारि बहाई ॥
 ह्वै प्रसन्न निजअंक उठाई । चूमि वचन अस गिरा सुनाई ॥
 धन्यधन्य बालक मतिधीरा । तोहिमिलिहैंविशेषि यदुवीरा ॥

दोहा—पंचवर्षकी वैस तुव, कीन्हो अगम पयान ॥

अतिशय अटपट होतैहै, क्षत्री कोप कृशान ॥ ३ ॥
असकहि ध्यान विधान बतायो । द्वादश अक्षर मंत्र सुनायो ॥
ठोंकि पीठि पुचकारि बहोरी । कीन्हो विदा सिद्धि कहि तोरी
मुनिवर पदमहँ धरिध्रुवशीशा । पश्चिम चलयो सुमरि जगदीशा
जौनविधान मुनीश बतायो । सोई करनलभ्यो चितचायो ॥
करैयमुन सादर अस्नाना । पूजै हरिकहँ सहित विधाना ॥
तीनितीनि दिन माहँ कुमारा । कैथा वदरी करै अहारा ॥
प्रथम मास यहि भाँति बितायो । द्वितियमासपुनिहरिचितलायो
षट्षट दिनमें पत्र पुराने । किय अहार महि झरे झुराने ॥
तृतीय मास नव नव दिन माहीं । किय केवल अहार जल काहीं ॥
द्वादश द्वादश दिवश बिताई । मारुत भख्यो भजत यदुराई ॥
यहिविधि चौथो मास बितायो । मास पाँचयो जब पुनि आयो ॥
तब दशद्वार इंद्रियन रोकी । हृदयमुकुंद रूप अवलोकी ॥

दोहा—खड़ो भयो इक चरणसों, अचल रोंकि निज श्वास ॥

हृदयकमलमहँथापिकै, मूरति रमानिवास ॥ ४ ॥

कृष्णदास जब श्वासहिरोका । रुकी श्वास तबही त्रैलोका ॥
पुहुमीभार पाय ध्रुवपाऊ । दबी येकदिशिजिमि गजनाऊ
सुर नर नाग उठे अकुलाई । काहुहि भेद न परचौ जनाई ॥
कृष्णशरणगे त्रिभुवनवासी । कहे पुकारि त्राहि अविनासी ॥
त्रिभुवन भयो श्वास अवरोधा । नाशत त्रिभुवनको अस योधा
देववचन सुनि कृपानिधाना । कह्यो भेद हमरो सबजाना ॥
भूपति तनय नाम ध्रुव जासू । भजन करत मेरो ममदासू ॥
तेहि तपतेज रुद्ध जग श्वासा । कियेकुमार मिलन मम आसा
होंतौ जाय दरश अवदेहौ । तासुसकल मन सोक नशैंहौ ॥

असकहि महामुदित मनस्वामी । सहित पारषद गणखगगामी ॥
 आयो दिशा प्रकाश बढ़ावत । रह्यो भूप बालक जहँ ध्यावत ॥
 अचलखड़ो हियहरिवपुदेखै । हरिविन और कछु नहिंलेखै ॥
 दोहा—खड़ेभये सन्मुखहरी, लख्यो तिन्हें सुकुमार ।

तब अतिअचरज मानि उर,लागे करनविचार ॥ ५॥
 धन्य धन्य नृप बालक येहा । किये निरंतर ममपदनेहा ॥
 मममूरति अपने मन राखी देखत सोइ खोलत नहिं आँखी ॥
 असविचारि ध्रुव उर निजरूपा । अंतर्हित हरिकियो अनूपा ॥
 चौकि उख्यो चट चखन उचार्यो। सोइ वपु सन्मुख खरो निहार्यो
 बहनलगी दृगते जलधारा । महामोद महँ मगन कुमारा ॥
 अनमिष चितवत कृष्ण स्वरूपा । मानत भयो भुवनकर भूपा ॥
 मुखते सकतन गिरा उचारी । छव्यो सुछवि मूरति मनहारी ॥
 उतरि गरुड़ते यदुपति धायो । ध्रुवउठाइनिजहिये लगायो ॥
 शीश सूंघ मुख चूमि मुरारी । बोल्यो वचन बहावत वारी ॥
 भूपतनय मम प्राण पियारो । तैं अनन्यहै दासहमारो ॥
 माँगुमाँगु मनको वरदाना । तोर मनोरथ पूर निदाना ॥
 सुख वश ध्रुवहिं सकल सुध विसरी । कछुक बातमुखते नहिं निसरी
 दोहा—स्तुति चाहत करन कछु, पंचवर्षको बाल ।

पै न बनत रचना करत, यह जानी गोपाल ॥ ६ ॥
 पाँचजन्य प्रभु शङ्ख अमोला । दीन्होपरस कराइ कपोला ॥
 शङ्खहिं परसत वेद पुराने । सकल शास्त्र ध्रुव हृदय समाने ॥
 लाग्यो स्तुति करन कुमारा । कहँलग करिय तासु विस्तारा ॥
 करि स्तुति किय दंड प्रणामा । पुनि करजोरि कह्यो मतिधामा
 अपनो मैं सरवस प्रभु पायो । यह मूरति छविहौं दृग छायो ॥
 और न आश कछु मनमाहीं । यह मूरति हिय बसै सदाहीं ॥

तुमहिं पाय यांचत संसारा । सो प्राणी मतिमंद गँवारा ॥
विहँसि कह्यो तव कृपानिधाना । लेहु भूप तुम अस वरदाना ॥
छत्तिससहस वर्ष महि काहीं । शासन करहु मुदित जगमाहीं ॥
पुनि मैं निज पार्षदन पठैहों । यानचढ़ाय विकुंठ बुलैहों ॥
धर्मधुरंधर धरणि अधीशा । नैहै तोहिं सुरासुर शीशा ॥
मेरोरूप चक्र शिशु मारा । जामें सकल वँध्यो संसारा ॥

दोहा—सो तेरे करपर रही, बँहै तासु अधार ।

सबके ऊँचे धामजो, तापर वास तुम्हार ॥ ७ ॥

असकाहे औरहु दै वरदाना । प्रभु विकुंठको कियो पयाना ॥
ध्रुवहु भवन निज चल्यो सुखारी । सुमिरत रमारमण गिरिधारी ॥
जब प्रयाग कहँ ध्रुव नियरान्यो । पै न उत्तानपाद नृप जान्यो ॥
दूत दौरि यक रह्यो भुवालै । निकरि गयो आवत सो बालै ॥
सुनि नृप ताहि दियो मणिमाला । चल्यो लेन आगू तेहि काला ॥
सुरुचि सुनीति चली दोउरानी । चल्यो उत्तमहुँ अति सुखमानी ॥
निरखि ध्रुवहिं भूपति द्रुतधायो । ललकि लपटि निजहृदयलगायो ॥
भयो मोद मन मिटी गलानी । लही फणिक मणि मनहुँ हिरानी ॥
प्रथम सुरुचि कहँ ध्रुव शिरनायो । सकुचि सो सादर हिये लगायो ॥
पुनि उत्तमहिं कियो परणामा । मिल्यो सोऊ भरि भुजनिललामा ॥
वँध्यो बहुरि जननिपद काहीं । ताकर मोद जात कहि नाहीं ॥
हरिदाहिन दाहिन सब ताके । हरिविमुखी विमुखी वसुधाके ॥

दोहा—यहिविधि मिलि ध्रुव पितु सहित, आयो अमल अवास

पुरजन परिजन ध्रुव निरखि, माने पूरी आस ॥ ८ ॥

ध्रुव गृह वसत बित्यो कछुकाला । तव उत्तानपाद महिपाला ॥
शील स्वभाव बुद्धि बलवेषा । अनुपम ध्रुव कुमारके देखा ॥
परिजन पौर सचिव सरदारा । येक समय बोल्यो दरबारा ॥

भूपति कह्यो चौथमन आयो । कानन गवन मोर चितचायो ॥
 उत्तम ध्रुव कुमार मम दोई । संमति करै जाहि सब कोई ॥
 तांकर राज तिलक करि देऊ । सुनहु मोर मनको अस भेऊ ॥
 बुधि वीरता विवेक बड़ाई । सकल भाँति ध्रुवकी अधिकाई ॥
 ध्रुव सब भाँति राज्यक योगू । यहिविधि जानहु मोर नियो गू ॥
 भूप वचन संमत सब कीन्हें । राजतिलक ध्रुवको करि दोन्हें ॥
 भूपगये कानन तपहेतू । ध्रुव किय राजसमाज समेतू ॥
 जापर दाहिन राम कृपाला । दाहिन ताहि जगत सबकाला ॥
 उत्तमचढ़ि इक समय तुरंगा । मृगया हित गो शैल उतंगा ॥

दोहा—मिल्यो यक्ष इक विपिनमहँ, ताते भो संवाद ।

सो उत्तम कहँ वधकियो, जिमि लघु अहि उरगाद ९॥

लौटि भवन उत्तम नहिं आयो । जननीतासु महादुखपायो ॥
 हेरन गई विपिनसुत काहीं । जरी दवानल माहि तहाँही ॥
 ध्रुवसों कह्यो देवऋषिआई । यक्ष हाथ हतिगो तुव भाई ॥
 सुनत कियो ध्रुव कोप कराला । चढ़्योतुरतरथ रुचिर विशाला
 चल्यो अकेल यक्षपुर जीतै । रामकृपा ध्रुव परमअभीतै ॥
 अलकापुरी निकट जब आयो । समरउछाही शङ्ख बजायो ॥
 कोटि यक्ष सो सुनि २ धाये । ध्रुवपै अमित अस्त्र झारिलाये ॥
 यक्षसंहाय रुद्र गणजेते । लगे करन ध्रुवसों रणतेते ॥
 कियो तहाँ संगर अतिघोरा । अगणितयक्ष यके नृपछोरा ॥
 धर्मधुरंधर धरणिअधीशा । ध्रुव करिदियो सबन विनशीशा
 हाहाकार करत सबभागे । मायाकरन फेरि बहुलागे ॥
 शस्त्रमारि मूद्यो ध्रुवकाँहीं । हरिबल ध्रुवशंका कियनाहीं ॥

दोहा—तब नारायण अस्त्रको, ध्रुवकीन्हो संधान ।

जारि यक्षकोटिन तबै, भरचो प्रकाशदिशान ॥ १० ॥

रणतजि भगे जरत जेवाँचे । पुनि नसमर कहँ ते मनराँचे ॥
 यक्षनाशलखि मनु महाराजा । ध्रुवाहिं आय कह सहित समाजा ॥
 अब नाहिं यक्षनको वध कीजै । नाती भवन गवन मनदीजै ॥
 पुनि धनेशकह ध्रुवसों आई । तुमपै हम प्रसन्न नृपराई ॥
 यक्षन हन्यो तोर बडभ्राता । नहियक्षनतैं कियो निपाता ॥
 जीवन मरण कालवश जानो । आनहेतु याको नहिंमानो ॥
 माँगहु मनवाँछित वरदाना । तुम परहै प्रसन्न भगवाना ॥
 विहाँसि कह्यो ध्रुव सुनहुनरेशा । हमनहिं माँगत छोड़ि रमेशा ॥
 माँगहु तुम जो होइ अभिलाषा । हम पूरण करिहैं सुखभाषा ॥
 जो वरेदेहु मोहिं बरियाई । हरिपद मम उर वसै सदाई ॥
 एवमस्तु कहि गयो धनेशा । ध्रुवआयो यश पायनिवेशा ॥
 छत्तिससहस वर्ष कियराजू । भाइन भृत्यन सहित समाजू ॥

दोहा—इहिप्रकार हरिभजनमें, तत्पर ध्रुव बड़भाग ।

सेवत साधु बिते दिवस, नित नव नव अनुराग ॥११॥
 जानि वृद्ध पन सुत दौराजू । गवन्यो विपिनभजत यदुराजू ॥
 तब पार्षद द्वै नंद सुनंदा । ध्रुवाहिलेन पठयो गोविंदा ॥
 लै भासित विमान दोउ आये । ध्रुवाहिं नाइ शिर वचन सुनाये ॥
 चलो भूप तोहिं नाथ बुलायो । सुनिध्रुवतिनहिंसुखितशिरनायो ॥
 चढ़ो विमान बजाइ निसाना । हरषित कियो विकुंठपयाना ॥
 मारगमें कह दासन पार्हीं । मममाता रहिगे माहिमार्हीं ॥
 विन मोहिको ताको लैजैहै । विनहरिको संसार छुटैहै ॥
 विहाँसि कह्यो हरिदास नरेशै । मतिकीजै ऐसो अंदेशै ॥
 जाके तुम सम भयो कुमारा । ताको कौन उधार विचारा ॥
 देखहु आगे आँखिउठाई । चढ़ीविमान जाति तुवमाई ॥
 आगे जाति निरखिनिज माता । ध्रुव वंद्यो हरिपद जलजाता ॥

जहँजहँध्रुव गमनत सुरधामा । तहँतहँके सुर करत प्रणामा ॥
 दोहा—यहिविधि गयो विकुंठ जब, हरि आगे चलिलीन ॥
 अचलधाम वैकुंठको, उत्तर द्वारो दीन ॥ १२ ॥
 इति श्रीरामरसिकावल्यसंतयुगखंडेत्रयोदशोऽध्यायः ॥ १३ ॥

अथ चित्रकेतुकी कथा ॥

दोहा—चित्रकेतुकी अब कहौं, कथा परम रमनीय ॥
 नारद जेहिउपदेशकरि, कियो संत गणनीय ॥

शूरसेन इकदेश अनूपा । उपज्यो चित्रकेतु तहँ भूपा ॥
 ताके रहीं लाख शतरानी । विभव तासु किमि जाइ बखानी ॥
 काहूके नहिं रह्यो कुमारा । यहि हित भूपति दुखी अपारा ॥
 वैज्यौ नृप इक समय सभामें । आये द्वैऋषीश तहिं जामें ॥
 भूप प्रणति करि कियसतकारा । मुनिन देखि नृपको दुखभारा ॥
 पूछ्यो कौन शोक नृप तेरे । कहहु जो जानन लायक मेरे ॥
 सकुचि भूप कह्यु कही नबानी । सचिवसकलकरिविनय बखानी ॥
 राज कोश दल गृह परिवारा । अहै फीक सब विना कुमारा ॥
 दया कियो सुनि मुनिअवदाता । कहकोई सुत सुख दुख दाता ॥
 असकहि अंगिर नारद दोऊ । अंतर्हित भे लख्यो न कोऊ ॥
 कृति दुति नाम रही यकरानी । ताके पुत्र भयो सुखदानी ॥
 जबते कृतिदुतिके सुत भयऊ । तबते अति सोहाग बढ़िगयेऊ ॥

दोहा—सवति सोहागन सहसकी, दैविषडारचो मारि ॥ १ ॥

सुतहि मृतक लखि दुख भयो, सो किमिजायउचारि ॥
 लाग्यो भूपति करन विलापा । परिजन पुरजन अतिसंतापा ॥
 रोदन सोर भुवन मधिछायो । पुनिनारद अंगिरयुत आयो ॥
 लग्यो बुझावन भूपहिजानी । पै सुतशोक नमिटी गलानी ॥

तब नारद तपवल सुत जीवा । आन्यो तुरत ज्ञानको सीवा ॥
 प्रविशि पुत्र तनमें हँसिभाष्यो । ममताकौन मोहिमहँ राख्यो ॥
 कबहुँ पुत्र तुम भये हमारे । कबहुँ पुत्र हम भयेतिहारे ॥
 रीति परस्पर यह चलिआई । यह माया जानहुरे भाई ॥
 नहिं कोउ सुत नहिंपितुकोउकेरो । वृथा सोच वशकरहु वनेरो ॥
 जीववचन सुनि भूपजुड़ान्यो । नारदसों अस वचन बखान्यो ॥
 गयो सोच मैं लह्यो विवेका । दीजै मंत्र मनोरथ एका ॥
 हरषि देवऋषि मंत्र सुनायो । ज्ञान विराग भक्तिविधि गायो ॥
 जप्यो मंत्र भूपति दिनसाता । तासु प्रभाव तेज अवदाता ॥

दोहा—हैं प्रसन्न तेहि शेष प्रभु, दीन्हो कामगयान ।

तेहि चढ़ि तीनों लोकमें, फिरे भूप हरषान ॥ २ ॥

भयो अविप विद्याधर केरो । मंत्रप्रभाव प्रकाश चनेरो ॥
 यहितनुगयो शेषके लोका । प्रभुहि निरखि मेढ्यो जगशोका ॥
 हैं पार्षद सो विचरन लाग्यो । विनय शील दाया रस पाग्यो ॥
 विचरत विचरत सो इककाला । गयो जहाँ गौरी शशिभाला ॥
 शंभुदिगंबर मुनिन समाजा । गौरी अंक लिये छवि छाजा ॥
 सनकादिकन करत उपदेशा । चित्रकेतु अस लख्यो महेशा ॥
 विसमित हैं बोल्यो असबानी । महादेव कीरति जगजानी ॥
 बैठि दिगंबर लै तियअंका । लज्या रहित होति यह शंका ॥
 मर्यादा पालक त्रिपुरारी । मुनि समाजमहँ लाज विसारी ॥
 चित्रकेतुके सुनि अस बैना । हर्ष विषाद नकियो त्रिनैना ॥
 मुनिहु मौन सब रहे तहाँहीं । पै सहिसकी शिवा सो नाहीं ॥
 जग उपदेशक शिव श्रुति गायोतेहि उपदेशक शठ यह आयो
 दोहा—यहिविधि कहि तेहि नृपतिको, गौरी दीन्हो शाप ॥

दैत्य देह दुर्मति लहै, यही तोर फलपाप ॥

शिवाशाप सुनि सो नृपज्ञानी । कियो प्रणाम जोरि युगपानी॥
 लियो शीश धरि शाप कराला।भयो नकछु दुख सुख तेहि काला
 हरि दासनकी है असिरीती । करहि न सुख दुख हरि परतीती॥
 सोई दैत्य वृत्रसुर भयऊ । जीतिशक्रयुत देवन लयऊ ॥
 भजन प्रताप सुरति नहिं भूली। कह्यो समर महँ बात अतूली॥
 हनहु शक्र हमको यहिकाला । अबमोहिंलगतजगत जंजाला॥
 नहिं कल विना शेषपद देखे । विन प्रभु जगत सून ममलेखे॥
 असकहि दीन्हो शीश नवाई । सुमिरत शेष चरण मनलाई ॥
 लैकर कुलिश कुलिश धर आसू। काटन लग्यो शीश तहँ तासू॥
 काटत बीतगयो यक साला । तब ताको शिर कट्यो विसाला
 फेरि शेष पार्षद ह्वै गयऊ । अक्षय निवास रमापुर भयऊ॥
 सो भागवत माहँ विस्तारा । मैं कीन्हौं संक्षेप उचारा ॥
 दोहा—भूलत भजन प्रताप नहिं, लहेहु कर्म वश योनि ।
 अपनो जन हरि जानिकै, मेटत सब अनहोनि ॥ ३ ॥

इति श्रीरामरसिकावल्यांसतयुगखंडेचतुर्दशोऽध्यायः ॥ १४ ॥

.अथ निमिराजाकी कथा ॥

दोहा—अब सुनिये निमिराजकी, कथा विख्यात पुरान ।

जासु वंशमें सब भये, नृप भागवत महान ॥ १ ॥

यज्ञ करन लाग्यो निमि राजा । बोलि वसिष्ठ लियो सुरराजा॥
 पुनि मुनि शक्रहिं यज्ञ कराई । आयो बहुरि जहाँ निमिराई ॥
 लख्यो गौतमहिं यज्ञ करावत । कियो कोप अस वचनसुनावत
 द्वितियपुरोहित कियमोहित्यागी । नाशलहै यहि हेतु अभागी ॥
 नृपहु शाप तैसाहिं तेहि दीन्हो । गुरुगुणिमनगलानिअतिकीन्हो

नृपहु मुनिहुँ कर भोतनुपाता । यह गुणि क्रीन्हो सोचविधाता
दियो वशिष्ठहिं तनु घटतेरे । आय निमिहुँ कह तनुहितटेरे ॥
निमि कहकरिवहुयतनमुनीशा । जो न त्यागि पावत जगदीशा
सो मोहिं सहज मिल्यो जगमाहीं । अब तनु लहन आशमोहिंनहीं
तब प्रसन्नहै विधि अस भाष्यो । तोरवास पलकन महुँ राख्यो ॥
तब ते येक अंश पलमाहीं । निवसत निमिनृपनाथ सदाहीं
येक अंशते रामसमीपा । सेवत सरसिज चरण महीपा ॥

दोहा—अजर अमर तेहि काय भै, पायो पार्षद रूप ॥

अचलबस्यो वैकुण्ठमहुँ, रामप्रताप अनूप ॥ २ ॥

इति श्रीरामरसिकावल्यांसतयुगखंडेपंचदशोऽध्यायः ॥ १५ ॥

अथ नवयोगेश्वरकी कथा ॥

दोहा—अब नौयोगेश्वरनकी, कहों कथा चितलाय ॥

जिनके वचन विचारिकै, तृणसम जगत जनाय ॥

सत कुमार भे ऋषभदेवके । सकल धर्म हरि कर्म सेवके ॥
तिनमें जे सुत रहे इक्यासी । भये विप्र द्विज वंश प्रकाशी ॥
जेठ सबनते भरत उदारा । महाभागवत धर्म अधारा ॥
दशभाई हींसों निज लीन्हो । नौभ्राता हरिपद मन दीन्हों ॥
जनमहिते त्याग्यो संसारा । समुझि ज्ञानबलसार असांरा ॥
अजर अमर भे भजन प्रभाऊ । जग उपदेशत शीलस्वभाऊ ॥
येक समय जहुँ निमि महाराजा । बैठ सभामधि सहित समाजा ॥
नौयोगेश्वर तहुँ चलिआये । करि सतकार भूप शिरनाये ॥
पूछन लगे भूप अनुरागे । उत्तर देन लगे बड़ भागे ॥
सो भागवत माहिं विस्तारा । वर्णत इत संक्षेप उचारा ॥
बहु विधि करि भूपति उपदेशा । विचरत रहे सिद्ध सब देशा ॥

जो जो संग कियो तिनकेरो । सो न बहुरि संसारहि हेरो ॥
 दोहा—कवि हरि पिपलायन चमस, करभाजनहु प्रबुद्ध ॥
 आविहौत्रहु दुमिल अरु, अंतरिक्ष अतिशुद्ध ॥ १ ॥

इति श्रीरामरसिकावल्यां सतयुगखंडेषोऽष्टशोऽध्यायः ॥ १६ ॥

अथ अंगराजाकी कथा ॥

दोहा—ध्रुवके वंशहिमें भयो, अंग भूप मतिवान ॥

ताकी गाथा में कछुक, वर्णौविदित पुरान ॥ १ ॥

भयो चक्रवर्ती महाराजा । जासु विभूति सरिस सुरराजा ॥
 पुत्रहेतु भूपति मख कीन्हो । दैव मृत्यु अंशहिंसुतदीन्हो ॥
 नामवेणु जन्महि ते पापी । ताहिनिराखनृपभो संतापी ॥
 राज कोश दल भवन बिहाई । अर्द्धराति निकस्यो नृपशई ॥
 कानन जाइ भज्यो यदुराई । माया और डीठिनहि आई ॥
 वनमें करहि साधुकी सेवा । साधु छोड़ि मानहि नहिदेवा ॥
 कोउ यक साधु कह्योनृपपार्हीं । कुटी देहु मेरे घर नाहीं ॥
 कुटी सहित सर्वस दै राख्यो । पुनि ताकी सेवाअभिलाख्यो
 साधुप्रसंग कह्यो अस वानी । मिलहिं तोहि नृप सारंगपानी
 भूपति कह्यो न असमोहिआसा । तेहि तजिचहौं न रमानिवासा ॥
 आये नृपकहँ लेन विमाना । साधु त्यागिसोकियनपयाना ॥
 हरि पार्षद तब संत चढ़ाई । लैगे नृपहिं विकुंठ लिवाई ॥ ॥

दोहा—वैकुंठहिमहँअंगनृप, साधुचरण रतिकीन ।

विभवभोगि पार्षदसरिस, यदपिकृष्णबहुदीन ॥ २ ॥

इति श्रीरामरसिकावल्यांसतयुगखंडेसप्तदशोऽध्यायः ॥ १७ ॥

अथ प्रियव्रतराजाकी कथा ॥

दोहा—भूप्रियव्रतकीकथा, अववर्णौंचितलाय ।

मनुकोसुतउत्तानपद, जासुंभयोलघुभाय ॥

बालक रह्यो प्रियव्रत जबहीं । नारद भवनगवनकियतवहीं॥
 दरशायो अति जगत विभीती । उपजायो हरिपद परतीती ॥
 प्रियव्रत चलयो देवऋषि संग । रँग्यो रुचिर रघुपति रतिरंगा॥
 मंदर कंदर बैअ्यो जाई । विभव विलास आशविसराई॥
 विधि मनु दोउसमुझावनआयो । नृपमनअचलनचलयोचलायो॥
 तब नारदहिंकह्यो मुखचारी । विन प्रियव्रतकोजगतसुधारी॥
 तब नारदहि कह्यो असवानी । करहु राज्य हरिकारजजानी ॥
 गुरुशासन गुणि पुनि घरआयो॥किये राज्य रघुपतिपदध्यायो॥
 ग्यारह अर्बुद वर्ष नरेशा । महिमंडलमहँकियो निदेशा॥
 प्रेममगन बीत्यो सब काला । कार्यसुधारचोकृष्णकृपाला ॥
 यदपि नमाया मोह निराना । तदपिभौनतेहिदुखदहिखाना॥
 तियसुत राज्य कोश परिवारा । छोड़ि प्रियव्रत गहनसिधारा॥

दोहा—तहँभजि यदुपतिकमलपद, यहप्राकृततनुत्यागि ।

गवन कियो गोलोकको, कृष्णचरणअनुरागि ॥

इति श्रीरामरसिकावल्यांसतयुगखंडेअष्टादशोऽध्यायः ॥ १८॥

अथ शेषमहाराजकी कथा ॥

दोहा—वैष्णवमतसुरसरिसुखद, तासुहिमाचलशेष ।

तासुकथारजकनकहाँ, वर्णितवेदअशेष ॥ १ ॥

ईश्वर सृष्टि करन जब राचौ । क्षिति जल तेजअनलनभपाँचौ॥
 भै जीवनकी धरणि अधारा । तासु अधार न परै निहारा ॥
 तब मुनि शेषसमीप सिधारो । पाणि जोरि असवचनउचारो॥

जीवन हेतु शेष, भगवाना । धरौ धरणि प्रभुकृपानिधाना॥
 विन धरणी के धरे तिहारे । रहिहैं कहँ जगजीव विचारे ॥
 दयानिधान सुनत मुनि वानी । पैठे प्रभु पताल सुखदानी ॥
 चौदह भुवन सहित ब्रह्मंडा । येक शीशसरसवसममंडा ॥
 दीननहित धारे प्रभु धरणी । परहित सकलसाधुकीकरणी॥
 शेष सरिसको परहित कारी । जो वैष्णवमत रीतिप्रचारी ॥
 जौनरीति गहि जग के प्राणी । भेटहिं भुजभरि शारंगपाणी॥
 सदा करहिं सिद्धन उपदेशा । सोइ मुनि उपदेशहिंसबदेशा॥
 जो कोइ चहै तरण जगसागर । भजै शेषपद सुमतिउजागर ॥

दोहा—सहसाननकेचरितइमि, अगणितभणितपुरान ।

यकमुखसोंमतिमंदमैं, केहिविधिकरोंबखान ॥ २ ॥

इति श्रीरामरसिकावल्यांसतयुगखंडेणकोनविंशोऽध्यायः ॥ १९ ॥

दक्षके पुत्र प्रचेतनकी कथा ।

दोहा—कहाँ प्रचेतनकी कथा, सुतबरही प्राचीन ।

जे यह जगमें आइकै, भये न जगमें लीन ॥ १ ॥

वर्धनकरन हेतु संसारा । प्राचेतन सिरज्यौ करतारा ॥
 कह्यो पिता तप करहु कुमारा । विन तप नहिं सिरजन अधिकारा
 सुनि पितुवचन सिद्धि सरकाहीं । चले प्रचेता अति मुदमाहीं ॥
 मारगमें नारद मुनि आये । संसृत सार असार दिखाये ॥
 सृष्टि करब यह संसृत मूला । विषयादिक याहीके फूला ॥
 जेतो श्रम संसृत हित कीजै । कस नहिं तेतौ हरि मन दीजै॥
 सुनि नारदके वचन कुमारा । भजन लगे वसुदेव कुमारा ॥
 तब प्रसन्न है दीनदयाला । चढ़े गरुड़ प्रगटे तेहिं काला॥
 करिकै कृपा धाम पठवायो । यह सुधि दक्षप्रजापति पायो॥

दशसहस्रसुत भे विज्ञानी । केहिविधि सृष्टि फेरि हम ठानी ॥
 अस विचार मन सहसकुमारा । विरच्यौ बहुरि दक्ष यक वारा ॥
 आयसु सृष्टि करन कहँ दीन्हो । तपहित सकल गवनवन कीन्हो ॥
 दोहा—आइ देवऋषि पुनि तिन्हें, समुझायो बहुभाँति ॥
 तेउ संसृति रति तजि भये, विरति निरत दिन राति ॥
 इति श्रीरामरसिकावल्यांस्ततयुगखंडेविंशोऽध्यायः ॥ २० ॥

अथ शतरूपाकी कथा ॥

दोहा—महाराज मनुकी भई, महरानी छविखानि ।
 शतरूपाकी अब कथा, में कछु कहौं बखानि ॥
 वामनछंद—कीन्हो विपिन तपजाय । हित मिलन श्रीरघुराय ॥
 वीत्यौ नहीं चिरकाल । भेप्रगट दशरथ लाल ॥
 कह माँगुरी वरदान । तब हृदय सुख न समान ॥
 करजोरि बोली वैन । अभिलषित अवहौंमैन ॥
 यहिते अधिक अब काह । देहौ हमें सुरनाह ॥
 अब मोरि पूजी आस । लहि वदन वनज सुवास ॥
 माँगहुँ यही वरदान । नित लखौं कृपानिधान ॥
 तब ह्वै प्रसन्न दयाल । कह वचन अस तेहि काल ॥
 हम होब तुव सुत मातु । सुख देव जग विख्यातु ॥
 ममबालचरित अपार । तैलखलहैसुखसार ॥
 अस भाष श्रीभगवान । भे तुरत अंतर्धान ॥
 सोइ भई दशरथ रानि । किय प्रगट जानकि जानि ॥
 दोहा—कौन तासु महिमा कहौं, जासु सुवन श्रीराम ॥
 बिना काम सब कामप्रद, सहित काम नहिं काम ॥
 इति श्रीरामरसिकावल्यांस्ततयुगखंडेएकविंशोऽध्यायः ॥ २० ॥

अथ देवहूतीकी कथा ॥

दोहा—देवहूति मनुकी सुता, दियो कर्दमहिं व्याहि ।

पतिसेवन तजि जगत सुख, लग्यो नीक नहिं ताहि ॥
 पति सेवतभो कृशतनु ताको । गह्यो धर्म सब पतिव्रताको ॥
 कियो विभवमुनि योग प्रभाऊ । पतिसेवन तजि तेहि नउराऊ ॥
 पति समीप इक समय सिधारी । पूछ्यौ मुक्त होव संसारी ॥
 कर्दम जानि तासु अधिकारा । कह्यो कृष्णसुत होइ तुम्हारा ॥
 सोइ प्रभु करिहैं सकल बखाना । असकहि कानन कियो पयाना
 देवहूति करि कृपा महाई । कपिलदेव प्रगटे यदुराई ॥
 योग विराग भक्ति अरु ज्ञाना । कियो बखान कपिल भगवाना
 पुनि गंगा सागर गवनतभे । करत जीव उपदेश वसतभे ॥
 देवहूती तहैं करि दृढ़ नेमा । करि सिय पिय पद पूरण प्रेमा ॥
 रही कपिल आश्रम कछु काला । लग्यो नतेहि संसृत जंजाला ॥
 कछुक काल जब तहाँ सिराना । आयो विमल विकुंठ विमाना ॥
 तेहि चढ़ि देवहूति सुखछाई । गैवैकुंठ निसान बजाई ॥

दोहा—आकूती ताकी भगिनि, दुती प्रसूती और ।

यहि विधि तिनकी जानिये, भक्ति रीति सब ठौर ॥

इति श्रीरामरसिकावल्यांसतयुगखंडेद्वाविंशोऽध्यायः ॥२२॥

अथ सुनीतिकी कथा ॥

दोहा—नृप उतानपदकी रहीं, रानी सुमति सुनीति ।

ध्रुव समान जाके तनय, कियो कृष्ण पद प्रीति ॥

ध्रुव अपमान सुरुचिते पाई । आइ मातु कहैं दियो सुनाई ॥
 मातु कह्यो तब अब सुनु ताता । भजहु जाइ हरिपद जलजाता ॥
 श्रीहरि संकट काटन हारे । दुती नरक्षक और तिहारे ॥

छोड़ि भवन वन गवन कीजिये । कृष्ण चरण रतिरंग भीजिये ॥
 पंच वर्षको बालक येक । कियो न तेहि त्यागत दुखनेक ॥
 जब ध्रुव कृपा पाइ यदुराजू । छत्तिससहस वर्ष किय राजू ॥
 कानन तप करि पाइ विमाना । कियो सुखित वैकुण्ठ पयाना ॥
 जननि सुरति करि तवहरिदासन । पूछ्यो कहा मात हितशासन ॥
 तब हरि पार्षद कह्यो बुझाई । सौंप्यो शिशु सुनोति यदुराई ॥
 हरि भरोस करि कियो न मोहू । पंच वर्ष बालक ताजि छोहू ॥
 सोई पुण्य प्रभावसुजाना । गवनत आगू तासु विमाना ॥
 ध्रुवहु लख्यो निज नैन उठाई । गवनकरत आगू निजमाई ॥

दोहा—यहि विधि गयो विकुण्ठको, सहित कुमार सुनीति ।

सो यहि विधि भवानिधि तरत, करतजोनिहचलप्रीति ॥

इति श्रीरामरसिकावल्यांसतयुगखंडेत्रयोविंशोऽध्यायः ॥ २३ ॥

अथ प्राचीनबर्हि की कथा ॥

कवित्त—भये भक्त प्राचीन बर्हिष नरेश एकविधिके नि-
 देशते पुत्र जन्यो दशहजार । तिन्है दीन्यो नारद विरति भये
 मुक्त सबै फेरि सुत सहस जन्यौ तेऊ तज्यो संसार ॥ नृप
 कोप्यो मुनिपै मुनीश देखरायो यज्ञ पशु चोखे शृंगनके ठाढ़े
 नभपै अपार ॥ भीति मानि भूपति निकारि वन तपकरि, भ-
 जिकै मुकुंद भयो संश्रुत जलधिपार ॥ १ ॥

इति श्रीरामरसिकावल्यांसतयुगखंडेचतुर्विंशोऽध्यायः ॥ २४ ॥

अथ सत्यव्रतकी कथा ॥

दोहा—सत्यव्रत संध्या करन, गवन सिंधुतट कीन ।

अर्घ्य देत अंजलि गिरचो, लघु अद्भुत इक मीन ॥

त्यागनं लग्यो भूप जलमाहीं । कह्यो मीन नृप दाया नाहीं ॥
 खैहै मोहिं बली जलचारी । तव नृप लियो कमंडलु डारी ॥
 भयो कमंडलु भरि सोइ भीना । तव नृप बृहद कुंभ महँ कीना ॥
 भये कुंभ भरि तज्यो तड़ागा । सरभरि होत वार नहिं लागा ॥
 तव नृपतज्यो सिंधुमें ताको । जान्यो कौतुक कंत रमाको ॥
 मीन कह्यो नृप दिवश सप्त महँ । वोरि देइगो सिंधु जगत कहँ ॥
 नृप सप्तर्षि सहित मतिधीरा । बैठ रहे सागरके तीरा ॥
 सतयें दिन रवि द्वादश उये । निजकर अग्निनि जारि जगदये ॥
 सातसमुद्र तजी पुनि वेला । कियो सलिल संसारहिं रेला ॥
 तबहिं नरेश निकट इक तरणी । आवतिभै अद्भुत हरि करणी ॥
 सहित सप्तऋषि चढ़्यो नरेशा । लै औषधि उर सुमिरि रमेशा ॥
 प्रगटे तबहिं मीन भगवाना । तनु योजन दश लाखप्रमाना ॥

दोहा—लै हरिवासुकि नागको, नावशृंग निज बाँधि ।

प्रलयजलधि विचरन लगे, नृपकारज अवरधि ॥ १ ॥

प्रलय जलधि जल जब छट्यो, वस्यो अवनि तबभूप ॥

यहि विधि राख्यो नृपतिको, कमलाकंत अनूप ॥ २ ॥

इति श्रीरामरसिकावल्यसंतयुगखंडेपंचविंशोऽध्यायः ॥ २५ ॥

अथ रहुगणकी कथा ॥

दोहा—भयो रहुगण राज इक, देश सिंधु सौवीर ।

योग भक्ति ज्ञानहु विरति, लहन चह्यो मतिधीर ॥

पावन सो उपदेश विचारयो । कपिलदेवके निकट सिधारयो ॥
 चल्योचपल चढ़ि विमलपालकी । सुरति करत वसुदेव लालकी ॥
 मारगमें थकिगो इकवाहक । तब हेरन पठ्यो परिचारक ॥
 तहँ जड़भरत खेत इक ताके । रहे रामरस रंगहिं छाके ॥

देखि पुष्ट पकरचोतिनकाहीं । लयाय न्यायो शिविका माहीं॥
जीव बचाय भरत पग धरहीं । शिविका हिलत भूपमनुगिरहीं॥
तव नृप कह करिकोपविशेयी । तजनु विषमगति वाहक तेपी॥
वाहक कहे न दोष हमारा । विषम चलत यह नयो कहारा॥
तव भूपतिजडभरतहि भाष्यो । वाहक बहुत वचन कटुभाष्यो॥
जो चलिहै शठसमगति नाही । तोहि ताडन करिहैं क्षणमाहीं॥
तव जडभरत कह्या मुसकाई । ताडक कोउ नहि परै लखाई ॥
हम तुम सबहैं काल कलेऊ । मोहि नजानि परत यह भेऊ॥

दोहा—महिपर पद पद पर उरू, तापर कटि पुनि कंध ॥
तापर शिविका फेरि तुम, मोहि न भार सम्वन्ध ॥ ३ ॥
सुनत वचन जडभरतके, भयो भूपके ज्ञान ॥
कूदि तुरत पगमेंपरचौ, जाहि जाहि भगवान ॥ २ ॥
करि तिनकी स्तुति बहुत, निजअपराध क्षमाय ॥
उतरनकी पूछत भयो, जो भवसिंधु उपाय ॥ ३ ॥
योग विज्ञान विराग मति, भरत कियो उपदेश ॥
भूप कृतारथ नाइशिर, लौटिगयो निजदेश ॥ ४ ॥
इति श्रीरामरसिकावल्यां सतयुगखंडेपट्टिंशोऽध्यायः ॥ २६ ॥

अथ ऋभुकी कथा ॥

सवैया—द्विजको सुतयेकरह्योऋभुनामकसोशिवमंदिरहैनिकस्यो
लखि चीकन रूप धरयो इक फूल कह्यो शिवमाँगु बरै दुलस्यो॥
तुमसों जो बड़ो सो दिखावो हमें ऋभुवालक यों तहैं भाषिलस्यो॥
हर वैनके पूरण हेतुहरी प्रगटेऋभुको जगजाल नस्यो ॥ १ ॥

इति श्रीरामरसिकावल्यांसतयुगखंडेसप्तविंशोऽध्यायः ॥ २७ ॥

अथ इक्ष्वाकुराजाकी कथा ॥

सवैया—जबते महिभूप इक्ष्वाकु भये हरिलीला रचै शिशुसंगनमें ॥
सतिभाव विलोकिकै तासु हरी कह्यौ मांगु रंगे रतिरंगनमें ॥
रघुराज कह्यो जस खेलत है तुमहु तस खेलो उमंगनमें ॥
मुसकाइ कह्यो हरि तेरेइ वंशमें खेलिहौ औधके अंगनमें ॥

इति श्रीरामरसिकावल्यांसतयुगखंडेअष्टाविंशोऽध्यायः ॥ २८ ॥

अथ पुरुरवाकी कथा ॥

दोहा—बुधको नंदन होत भो, पुरुरवा महाराज ॥

ताकी छबि वर्णनकियो, नारद देव समाज ॥

तहँ उर्वशी सुनत मन मोही । कह्यो मनहि कब देखोंवोही ॥
उतारि स्वर्गते नृपढिग आई । राजहु देखि रह्यो ललचाई ॥
प्रीति समान भई दुहुँकेरी । तब उर्वशी गिरा अस टेरी ॥
तुमको नग्न देखि जब लैहैं । तब हम त्यागि तुम्हें दिवि जैहैं ॥
असकहि रहन लगी नृप नेरे । उतै शक्र गंधर्वन प्रेरे ॥
रहे उर्वशीके युग छागा । किये रही तिनपै अनुरागा ॥
तिनहिं हरे भाँव निशिमाहीं । तब उर्वशी कह्यो नृपपाहीं ॥
हरल छाग गंधर्व हमारे । भूपनपुंशक बल न तुम्हारे ॥
परेनग्न तैसहिं नृप धायो । तब गंधर्व बिजुलि चमकायो ॥
देखि उर्वशी नग्न नरेशै । जात तुरंत भई दिवि देशै ॥
बिना उर्वशी भूप दुखारी । फिरन लग्यो कटिमहीमँझारी ॥
एकसमयकुरुक्षेत्रहि आयो । तहाँ उर्वशी दर्शन पायो ॥

दोहा—पकरि चरण रोवन लग्यो, कही नाइशिर बात ॥

रे पापिनि अब काकरति, मेरे जियको घात ॥ १ ॥

तब उर्वशी कही मुसकाई । गंधर्व यज्ञ करहु नृपजाई ॥

मिलिहों त्वहिं गंधर्व देश में । ह्वै हौ अवशि उधार शोकमें ॥
 फिरचो भूप प्राणहि असपाई । गंधर्व यज्ञ कियो मनलाई ॥
 गयो जबहिं गंधर्व अगारा । मिली उर्वशी प्राणअधारा ॥
 बहुत दिवस दोउ रमें सुखारी । काल विपमगतिदियोविसारी ॥
 पुण्य क्षीणते पुण्य जननकी । पुनि पुनि गतिहै अवनपतनकी ॥
 भई गिलानि भयो पुनि ज्ञाना । त्राहि कहत सुमरचो भगवाना ॥
 तुरत उर्वशी कहँ नृप त्यागी । निदरचोनिज कहँ जानि अभागी ॥
 सुरसमान सुख सकलविसारचो । बारवार असवचन उचारचो ॥
 नारिनेह मैं जो नर छाको । नश्यो लोक परलोकहु ताको ॥
 फाँस्यो जाहि फंद में नारी । होत ताहिकी दशा हमारी ॥
 असकहि ह्वै अनन्य हरि ध्यायो । निहछलजानि कृष्णअपनायो ॥

दोहा—रमारमणपुरगवनकिय, पुरूरवामहाराज ।

ऐसहिरेनृपकी कथा, जानहिंसंतसमाज ॥ २ ॥

इति श्रीरामरसिकावल्यांसतयुगखंडेएकोनत्रिंशोऽध्यायः ॥ २९ ॥

अथ गयराजाकी कथा ॥

कवित्त—मनु महाराज वंश भयो गयो राज कोई चक्रवर्ती झा-
 सन चलायो चारों ओरह ॥ कीन्हो यज्ञ ऋत्वक्जन दीनो
 भाग देवनको विनाहरि आये नृप मान्यो ना निहोरहै ॥ परचो
 व्रत तीन दिन हरिकी लखन आश रख्यो टकलाइ जैसे चंदको
 चकोरहै ॥ मंडन महीपति मनोरथ के मुखमें दयालु दौरिआयो
 दशरथको किशोरहै ॥ १ ॥

इति श्रीरामरसिकावल्यांसतयुगखंडेत्रिंशोऽध्यायः ॥ ३० ॥

अथ देवल उतंक और हरिदासकी कथा ॥

दोहा—देवल और उतंकहू, अरु अमूर्तिहरिदास ।

जन्महिते ई तीनिजन, करीनजगकीआस ॥

इति श्रीरामरसिकावल्यसंतयुगखंडेकत्रिंशोऽध्यायः ॥ ३१ ॥

अथ नहुपराजाकी कथा ॥

कवित्त—इंद्र ब्रह्म हत्या भीति भागे कंजनाल डरचो नहुपै मुनीश इंद्रपद बैठायोहै ॥ शचीके समीप चलयो मुनिन लगाय यांन सर्पके कहत मुनि सर्पही बनायोहै ॥ हिगिरि कंदरा में गिरिकै बितायो काल ताके भाग विवश युधिष्ठिर सिधायोहै ॥ जानि पूर्व पुरुष गलानि दै विज्ञान दीन्हो पाछै अपवर्ग शाप स्वर्गको छुड़ायो है ॥ १ ॥

इति श्रीरामरसिकावल्यसंतयुगखंडेद्वित्रिंशोऽध्यायः ॥ ३२ ॥

अथ मान्धाताकी कथा ॥

कवित्त—भयो मान्धाता भूष धाता सों जगतबीच ताके दरबार ऋषि सौभरि सिधायो है ॥ माँग्यो येक कन्या भूष कद्यो तुम्हे वरै जोई सोई लेहु सुनि मुनि तरुण ह्वे भायो है ॥ नृपके पर्चास कन्या मुनिने पचासो वरचो भूपति पाँचसौ दियो रामरति छायोहै ॥ लखि निहकाम दान दीरघ दयालुनाथ रघुराज मानंधातै जगते छुड़ायोहै ॥ १ ॥

इति श्रीरामरसिकावल्यसंतयुगखंडेत्रयःत्रिंशोऽध्यायः ॥ ३३ ॥

अथ पिप्पलायनकी कथा ॥

कवित्त—ऋषिपिप्पलायन शमीक माया दर्शतैसे पुलह पुलस्त्य और च्यवन ऋचीकहै ॥ अंगिराहू लोमशादि औरहू मुनीश

जेते भये महाभागवत कीन्हो ध्यान ठीकहैं ॥ अष्टकुली नांगशेष
चरण लगायो चित्त जमदग्नि की पुराणनमें नीकहैं ॥ कहों मैं कहा-
नी कहा कश्यप की जाते भई सुरासुर सृष्टिपे नमायागैनजीकहैं ॥

इति श्रीरामरसिकावल्यांसतयुगखंडेचतुर्विंशोऽध्यायः ॥ ३४ ॥

अथ सगरकी कथा ॥

कवित्त—सगर नरेश साठि सहस लह्यो जे सुत अश्वमेध वाजी
संग तिन्हें भेजि दीन्हो है ॥ हरयो शक्र वाजीको न पायो हे
रे खन्यो मही कपिल शराप दैकै भस्म तिन्हें कीन्हो है ॥
सगरनरेश केरे भयो ना विषाद कछू त्याग्यो असमंजसको
पापी चित्त चीन्होहैं ॥ नाती अंशुमानको नरेशरचिदैकै राजिर-
घुराज आप रामपुर पथ लीन्होहैं ॥ १ ॥

इति श्रीरामरसिकावल्यांसतयुगखंडेपंचविंशोऽध्यायः ॥ ३५ ॥

अथ वशिष्ठऋषिकी कथा ॥

दोहा—मुनि वशिष्ठकी मैं कथा, कहों कौन मुखलाय ।
जिनको श्रीरघुवंशमणि, लीन्हो गुरु बनाय ॥ १ ॥

इति श्रीरामरसिकावल्यांसतयुगखंडेष्टविंशोऽध्यायः ॥ ३६ ॥

अथ भृगुऋषिकी कथा ॥

दोहा—सरस्वाति तट शंका उठी, मध्यमुनीन समाज ।

विधि हरि हरमें को बड़ो, यह जाननके काज ॥ १ ॥

सकल मुनिन संमत करि दीन्हों । भृगु पयान जानन हित कीन्हो ॥
प्रथम विरंचि समीप सिधाये । विधिहिनिरखिनहिंशीशनवाये ॥
कियो कोप भृगुपै मुखचारी । भृगु कैलासहि गये सिधारी ॥
मिलनहेतु शिव उठे मुनीशै । तब भृगुकोपिकह्यो असईशै ॥

रे निर्लेज भसम अँगधारी । तोहि न छुवनमति होतिहमारी ॥
 यह मुनि शिव सकोपलैशूला । धाये भृगुहिं करन निर्मूला ॥
 शिवहिंक्षमा तब उमा कंरायो । भृगुतुरंत वैकुंठहि आयो ॥
 द्वारपाल कीन्हे नहिं वारन । निकसि गये भृगु सातौंद्वारन ॥
 मणिमंदिर सोहत विधिनाना । श्रीसहित सोवत भगवाना ॥
 प्रभुउर किय भृगु चरणप्रहारा । उठे नाथ मुनिनाथ निहारा ॥
 निजकर गहि मुनि पद अनुरागे । बार बार हरि मीजन लागे ॥
 कठिन कुलिशते हृदयहमारो । कमलहु कोमल चरणतिहारो ॥

दोहा—क्षमाकरहुअपराध यह, किय धनि मोहिं मुनिराज ॥

रमा वसन लायक भयो, मेरोउर यह आज ॥ १ ॥

भई पुनीत आज सब भौंती । परसत पद राउर यह छाती ॥
 जेहितन परहि विप्रपग धूरी । पूरव पुण्य कियो सोइपूरी ॥
 लखिसुशीलता भृगु प्रभु केरी । वारिधार दृग बही घनेरी ॥
 पुलकित तनुकछु कहिनहिआयो।चल्यौलौटिमुनिअतिसुखपायो
 आयो सरस्वती सरि तीरा । जहँबैठे सब मुनि मतिधीरा ॥
 विधि हरको वृत्तांत बखाना । बहुरिकह्यो जो किय भगवाना ॥
 सबते बड़ो हरिहिं मुनि जाने । दयानिधान न दूसर माने ॥
 पूरणप्रीति रीति परतीती । भजनलगेहरिकहँ मनजीती ॥
 क्षमा दया रति शील सनेहू । हरि तनु किये रहै सब गेहू ॥
 दूजो को हरि सरिसदयाला । लखत दीनहै जातबिहाला ॥
 जो न होत हरि दीन सनेही । भाषहु संत भजत पुनि केही ॥
 उभयलोक जो चहहु सुपासू । तौ चाहहु चित रमानिवासू ॥

दोहा—याग विज्ञान विरागरति, कठिन जानि यदुनाथ ।

सरल उपाय कह्यो सबन, धरहु संतपदमाथ ॥ २ ॥

इति श्रीरामरसिकावल्यांसतयुगखंडेसप्तत्रिंशोऽध्यायः ॥ ३७ ॥

अथ दालभ्यमुनिकी कथा ॥

दोहा—अरु दालभ्य मुनीशकी, कथा पुराणप्रसिद्ध ।

जासु कथित वर्णत वदन, होत कार्य सब सिद्ध ॥ ३॥

इति श्रीरामरसिकावल्यांस्ततयुगखंडेअष्टत्रिंशोऽध्यायः ॥ ३८ ॥

अथ उत्तानपादराजाकी कथा ॥

दोहा—नृपउत्तानहुपादकी, कहौं कथा केहि रीत ।

भयो जासु ध्रुवसौं सुवन, कियो कुटुंब पुनीत ॥ १ ॥

इति श्रीरामरसिकावल्यांस्ततयुगखंडेनवत्रिंशोऽध्यायः ॥ ३९ ॥

अथ दक्षकी कथा ॥

दोहा—दक्षकथा भागवतमें, वर्णित युत विस्तार ।

तातें मैं यहि ग्रंथमें, कीन्हो नाहि उचार ॥ १ ॥

इति श्रीरामरसिकावल्यांस्ततयुगखंडेचत्वारिंशोऽध्यायः ॥ ४० ॥

अथ सौभरिकी कथा ॥

दोहा—यमुनामें निरखत भयो, सौभरि मीन विलास ।

मान्धातानृपसौंसुता, ल्याये माँगि पचास ॥

रच्यो विभव निज योग प्रभाऊ । वसन अमल आभरणजराऊ ॥
पृथक २ मणिमंदिर सोहे । निरखत सुर सुंदरि गणमोहे ॥
कियो बहुत दिन भोग विलासा । तदपि काम पूरी नहिं आसा ॥
निरखि अनित्य जगतकी रीती । संसृत सुखपर भई अप्रीती ॥
बार बार मन महुँ पछिताई । निकसि चले सब विभव विहाई ॥
हरि अनुरागहिं जगत विरागा । उभय भँति मुनि कर मनलागा ॥
मान्धाताकी सुता पचासा । लखिपतिरीति तजी जगआसा ॥
भजन लगीं यदुनंदन काहीं । वसि २ विपिन एकाँतनमाहीं ॥

अचिरकाल महीं श्रीभगवाना । निज हित मिलन नेम दृढ़ जाना
मिले मुनिहिं अरु नृपतिकुमारी । सबको कियो रमापुर चारी॥
कियो न कन्या तरण उपाऊ । मिले कृष्ण सतिसंग प्रभाऊ॥
जिमि रीझत सतसंग सुरारी । तिमि नहिं योग याग तपभारी॥

दोहा—योग अचल मनज्ञान सम, जगको त्याग विराग ॥

विना भक्ति नहिं सिद्धि, त्रयभक्ति सैत संगलाग ॥

इति श्रीरामरसिकावल्यांसतयुगखंडे एकचत्वारिंशोऽध्यायः ॥ ४१ ॥

अथ कर्दमकी कथा ॥

दोहा—कहों बहुरि कर्दम कथा, देवहूतिको कंत ॥

जाको योग विराग लखि, रीझिगये भगवंत ॥

कर्दम भये प्रजापति नंदन । विधिकह सृष्टि करहु कुलचंदन॥
सृष्टि करव गुणिजग जंजाला । बसे विपिन कर्दम तेहिकाला ॥
लवहुमात्र जग चित नहिं लागा । छनछन बढ़यो कृष्ण अनुरागा
भेप्रसन्न प्रभु कर्दम पारीं । आये द्रुततिन आश्रम मारीं ॥
कर्दम कियो दंड परणामा । बोलि नआयो लहि सुखधामा॥
हरिकह इत ऐहै मनुभूषा । देहैं तुमको सुता अनूषा ॥
ताके मैं लैहौं अवतारा । करिहौं योग विज्ञान प्रचारा ॥
सृष्टिकरनहितदियविधिशासन । मोहितुसृष्टिकरउभयनाशन ॥
अंतरहित हरिभे कहि ऐसो । प्रभुजस कह्यो भयो सब तैसो ॥
देवहूति पति सेवन लागी । निज तनु सब सुपास सुख त्यागी ॥
लागि दया मुनिविभववनायो । जोसुखलखिसुरपतिललचायो ॥
भोग विलास फेरि मुनित्यागी । कानन चले राम अनुरागी ॥

दोहा—देवहूतिहि अस कहतभे, हैहैं हरि सुत तोर ॥

करि उपदेश सो छोरिहैं, तुव भवबंधन घोर ॥ ९ ॥

इति श्रीरामरसिकावल्यांसतयुगखंडे द्विचत्वारिंशोऽध्यायः ॥ ४० ॥

अथ मांडव्यमुनिकी कथा ॥

दोहा—रहे येक मांडव्यमुनि, रंगे राम अनुराग ।

मायावन वीरुध विपै, सुख सुमवासन लाग ॥ १ ॥

यक नृप भवन गये कोउ चोरा । मूस्यो मुक्तमाल चित्तचोरा ॥
चले जवहिं लै सौपजमालां । सोरराजगृह भो तेहिक्काल ॥
चोरन पकरन हित भट धाये । यह सुनि सोर चोर भयपाये ॥
लख्यो न आपन बचव पराई । मिल्यो मार्ग मांडव मुनिराई ॥
तिनके गले डारि मणिमाला । चोर पराय गये तेहिक्काल ॥
पाछे दूत दौर तहँ देखे । मुनि मांडव्य चोर करि लेखे ॥
मुनिहिं पकरि लै चले तुरंता । लयाये नृपति निकट बलवंता ॥
नृपकहँ देहु चोर कहँ सूरी । संतभेष यह चोर कमूरी ॥
तुरत दूत पुर बाहिर लाई । सूरीमहँ दिय मुनिहिं चढ़ाई ॥
प्रेममगनमुनि भयो न भाना । हरिप्रभाव निकसे नहिं प्राना ॥
सूरी चढ़े बिते दिनसाता । मरे न मुनि आश्चर्य अघाता ॥
खबरि नरेश सकल यह पाई । मुनि समीप महँ आयो धाई ॥

दोहा—चीन्ह मुनीशहिं त्राहिकहि, कीन्होदंडप्रणाम ।

क्षमहु मोरअपराधप्रभु, मैकियअनरथकाम ॥ २ ॥

सूरीते लिय तुरत उतारी । बारबार दीनता उचारी ॥
मुनि दयालु कह दोष न तोरा । यह यमराज दोषअतिवोरा ॥
असकहि नृपहिं प्रबोध मुनीशा । गये जहाँ संयमनी ईशा ॥
यमलखि कियो बहुत सतकारा । मुनि सकोपअसवचनउचारा ॥
रे यमको न भयो अपराधा । जाते मोहि दीन्ही यह बाधा ॥
यम डेराय बोले अस वानी । पूर्वजन्म असकियमुनिज्ञानी ॥
बालक रहे समयइक आपू । खेलत यकजीवहिंदियतापू ॥
गहि फरफुंदा तेहि गुद माहीं । डारचो सीक दया भै नाहीं ॥

सोइ अपराध लह्यो तुम सूरि । गुदते शिरहै निकसो झूरी ॥
मुनि सकोप तब कह असवानी । मैं तौ रह्यो बाल अज्ञानी ॥
कृत अज्ञान अपराध हंमारा । तैं न कियो यम मूढ़विचारा ॥
ताते शूद्र होहु तुम जाई । औरहु कछुहौं देत सुनाई ॥

दोहा—चौदहवर्ष प्रयंतलौं, बालक रहत अज्ञान ।

करतनीक नेवर नहीं, पाप पुण्य कर भान ॥ ३ ॥

ताते चौदहिवर्षलगि, पाप पुण्यनहिं होइ ।

ऊरधताके फल लहै, करणीको सब कोइ ॥ ४ ॥

असकहि मुनि गवनतभये, हरिपदचित्तलगाय ॥

नृपविचित्रवीरजभवन, भये विदुरयमआय ॥ ५ ॥

इति त्रिचत्वारिंशोऽध्यायः ॥ ४३ ॥

अथ पृथुमहाराजकी कथा ॥

दोहा—वर्णौ पृथु महाराजकी, कथा कथितसुपुरान ।

याके सम भव भूमिमें, भयो भक्तनहिंआन ॥ १ ॥

भयो वेणु भूपति अति पापी । परजनको अतिशय संतापी ॥

भस्म कियो तेहि मुनिदै शापा । मिट्यो पुहुमिते पूरण पापा ॥

पुहुमीपति विन पुहुमिअनाथा । यहि लखिकै सिंगरेमुनिनाथा ॥

मथन कीनो वेणु शरीरा । तेहिते पृथु प्रगटे मतिधीरा ॥

ज्ञानमान पुनि परम सुजाना । भक्तिमान भवभूतिनिधाना ॥

देवन सहित विरंचि सिधाई । पृथुहिं सिंहासनमहँ बैठाई ॥

निज २ वस्तु देव सब दीन्हे । वंदीगण अस्तुतिअतिकीन्हे ॥

निजस्तुति मुनि पृथुमहाराजा । कह्यो काहु अनुचितयहकाजा ॥

मृषा प्रशंसन निंदन होतो । जिमि प्राची विन भानु उदोतो ॥

जामे जेतनो गुण लखि लीजै । तेतनो तासु प्रशंसन कीजै ॥

येकहु गुण है नहिं मोंमाहीं । स्तुति करव उचित अवनाहीं॥
सुनि पृथुवचन विरंचि सुखारी । वंदिनसों असगिरा उचारी ॥
दोहा—करहु प्रशंसभविष्यसव, पृथुभूपतिको सर्व ।

यहिसम कोउ नहोइगो, गैहैंयशगंधर्व ॥ १ ॥

वंदी वचन मानि विधि केरो । भने भविष्य प्रशंसवनेरो ॥
स्तुति करि गवने दिगपाला । यहिविधि बीति गयो कछु काला
परचो जगत दुर्भिक्ष महाना । प्रजाभूप ठिग कियो पयाना ॥
अति दुर्भिक्ष जनित दुखपाये । पृथु धरणीकर दोष लगाये ॥
जोपै धरणि अन्न उपजावति । तो नहिं प्रजा मोरि दुखपावति ॥
असकहि चलयो शरासन धारी । अवनी उपर कोष करि भारी ॥
इकशर हनन चह्यो महिकाहीं । तासुतेज सहि सकी सो नहिं ॥
जगती तहाँ महा भयमानी । गऊरूप धरि तुरत परानी ॥
सातहुलोक भूमि फिरि आई । सक्यो नराखि कोऊ सुरराई ॥
पुनि पृथु सन्मुखभै महि ठाढ़ी । त्राहि त्राहि बोली भय बाढ़ी ॥
धर्मधुरंधर पृथु महाराजा । नारि वधत कतलगाहि नलाजा ॥
पृथु कह प्रजा दुखद जो कोई । ताहिवधे कछु पाप न होई ॥

दोहा—कह्यो धरणि परजाहि तै, दुहहुमोहिं महाराज ॥

यह उपाय हैहै सकल, सिद्धि सबनको काज ॥ २ ॥

धेनुरूप धरणी तव राजा । दुहनलग्यो परजनके काजा ॥
अन्न अनेकन जब दुहि लीन्हो । पुनि औरनकहैं आयसु दीन्हो ॥
सिद्ध सुरासुर मुनि गंधर्वा । दुहहु जौन भावै जेहिं सर्वा ॥
पृथुशासन सुनि सकल सिधारे । दुहे धरणि जगजीव अपारे ॥
भयो सकल त्रिभुवनकर काजा । कहैंसबै जय पृथु महाराजा ॥
पुनि पृथुराजराज बहु कीन्हो । सबै प्रजनको आनंद दीन्हो ॥
अश्वमेध नवनवाति प्रचारा । सुनहु भयो जो सतयें बारा ॥

सतयेंवार यज्ञ . महाराजा । जोरी सुर नर सिद्ध समाजा ॥
 बासदेव विधि आदिक देवा । आये सकल करन पृथुसेवा ॥
 येकपुरंदर भर नहिं आयो । अपने अतिघमंड महुँ छायो ॥
 यज्ञविध्वंसन हितचितचोपी । चल्यो पुरंदर पृथुपै कोपी ॥
 हरचो यज्ञ बाजी मख आई । लै गवन्यो निजरूप छिपाई ॥
 तबै अत्रिमुनि दियो बताई । हरत यज्ञ बाजी सुरराई ॥

दोहा—दिक्षितराजा यज्ञ में, उठचो न शरधनु धारि ॥

जेठे अपने पुत्रको, कह्यो प्रचारि प्रचारि ॥ ३ ॥

मेरे मखको पूजित बाजी । लीन्हे जात पुरंदरपाजी ॥
 सुनि पृथुशासन सुतवरिवंडा । चल्यो चढ़ाइ चपल कोदंडा ॥
 जाय निकट वासवहिं प्रचारा । हरे चोर कत घोर हमारा ॥
 पृथुसुतकाहिकालसम देखी । भग्यो पुरंदर अतिभय लेखी ॥
 भागेहु बचव न जानि सुरेशा । धरचो तुरत दंडीकर वेशा ॥
 पृथुपुत्रहि भ्रम भयो विलोके । धर्म विचार शरासन रोके ॥
 पूछन लग्यो शक्रकेहिंठोरा । हरिलैगयउ तुरंग जो मोरा ॥
 शिरकंपन करि सो किय नाहीं । नृपसुत भयो निराशतहाहीं ॥
 लौठ्यो जब तव अत्रि मुनीशा । कह पुकार करितैनहिं दीशा ॥
 दंडीरूप घोरको चोरा । सोइ वासव वैरीहै तोरा ॥
 सुनि बहुरचो पृथु पुत्र रिसाई । लै बाजीकहँ वासव जाई ॥
 भाग्यो सुरपतिसबै दिशानन । प्राणजात नृप नंदन वानन ॥

दोहा—जब जमुक्यो कछु पृथुतनय, तब तुरंग तहँ छोड़ि ॥

भयो पुरंदर अलखउर, सक्यो न सन्मुख वोड़ि ॥ ४ ॥

लै बाजी आयो मखशाला । पृथुनरेश सुत बली विशाला ॥
 सब मुनीश अति पाय हुलामू । नामधरचो ताकरविजितामू ॥
 बहुरि पुरंदर हरचो तुरंगा । जिमि मुनि मानसविषयनसंग,

चल्यो सकोप बहुरि विजितामू। करन शक्र विन प्राणहिं आमू॥
 लख्योशक्र निजरिपु मनु काला। जानि अंत निज भयो विहाला
 धरचो अवोरी वेष तुरंता। खरो भयो मगमहँ छलपंता ॥
 भयो फेरि विजिताश्वहिधोखो। तज्यो नवाणहननहितचोखो ॥
 लौटि चल्यो तव अत्रिपुकारो। सोइ अवोरी शत्रु निहारो॥
 तुरत फिरचो संधानतसायक। अब न बची कैसेहु सुरनायक॥
 कालजानि अपनो असुरारी। वाजि विहाय भग्यो भय भारी
 लैतुरंग आयो मखशाला। दियो मुनिन कहँ मोद विशाला॥
 जौन जौन वासव वपुधान्यो। सोइ २ पुहुमि पखंडप्रचारचो॥

दोहा—निरखिशक्रशठता सपदि, कोपित पृथुमहाराज ।

संधान्यो कुशवाण इक, करन अंत सुरराज ॥५॥

संधानत सायक विकराला। उठी ज्वालदशदिशितेहिकाला
 त्रिभुवन माच्यो हाहाकारा। शक्रनाश सब कियो विचारा॥
 भुवन होत विनवासवकेरो। गुणिविधि शोकितभयोघनेरो॥
 आयो पृथु महीप मखमाहीं। बैच्यो लहि सतकार तहाँहीं ॥
 कह्यो वचन हेभूप शिरोमनि। धर्माधारधरणिधनिधनिधनि ॥
 तुम यदुनाथ अनन्य उपासी। नाहिं ममसिरजितलोकविलासी॥
 शतमख करत जगतमहँजोई। लहत पुरंदरपद भरिसोई ॥
 नशत सोउ लहि नेसुककाला। यह नहिं भक्त महत्व विशाला ॥
 ताते यज्ञ रहन अब दीजै। यदुपति प्रेम सुधारस पीजै ॥
 सुनि विधिवचन भूप हरि दासा। एवमस्तु कहि लख्यो हुलासा॥
 सकल कर्म पृथु कियो अकामा। रही आशलखिहँ कव श्यामा ॥
 करत ध्यान बैठो निज आसन। धारत धर्मधुरंधर शासन ॥

दोहा—पृथुकी जो मन कामना, ताहि जानि यदुराज ।

धायो तुरत विकुंठते, चढ़ि वाहनखगराज ॥ ६ ॥

मारग माहिं गुन्यो मनमाही । इंद्रवचन अब कैस्यो नाही ॥
 मम जन द्रोह जनित अपराधा । करीविशेषि बासवहिं बाधा ॥
 तातेले बासव सँग जाऊं । पृथु नृपशरणागत करवाऊं ॥
 असकहि हरि हरि लियोहँकारी । आये शंख चक्र करधारी ॥
 सुर नर मुनिसव हरिहिं विलोकी । जय जयकहि भे सकल अशोकी ॥
 तेहि क्षणको पृथुको आनंदा । मैकिमि वरणिसकों मतिमंदा ॥
 तृपित लहै जिमि सुरसरिधारा । देइ मृतक जिमिजिय करतारा ॥
 उख्यो नरेश दौरे हरि आगे । दंडसमान गिरयो अनुरागे ॥
 उख्यो बहुरिकछुकहिनहिं आयो । बार बार दृगवारि बहायो ॥
 प्रेम मगन मन पुलकित गाता । करत पान छवि नाहिं अघाता ॥
 अचलखरो बीत्यो यक जामा । वारचोतन मन जन धन धामा ॥
 भेप्रसन्न प्रभु पृथुहिंनिहारी । बार बार तेहि मिले मुरारी ॥

दोहा—प्रभुहिं मिलत सकुचत नृपति, धनि धनिमानत भाग ॥

प्राकृत मोर शरीर यह, प्रभु अंगनमहँ लाग ॥ ७ ॥

धरे गरुड़ गल प्रभु इक हाथा । इक कर फेरत पंकजनाथा ॥
 प्रभु सों भन्यो माँगु वरदाना । तोहिंसम भक्त भयो नहिं आना ॥
 त्रिभुवन माहिं पदारथ जेते । तोहिंदेत लागत लघु तेते ॥
 तब पृथु कह्यो जोरि करदोई । जो माँगो पाऊं प्रभु सोई ॥
 प्रभु कह जौन अहै कछु मोरे । नाहिं अदेय नृपनायकतोरे ॥
 पृथुकह संत कथित यशतेरो । द्वै श्रुति सुनिनतृपित मनमेरो ॥
 दशहजार दीजै मोहिं काना । सुनहुँ रावरो सुयश महाना ॥
 सुनत अलौकिक नृपकी वानी । करि कृपालु तेहि कृपामहानी ॥
 बोले वचन मंद मुसकाई । हमहु तोहिं याचै नरराई ॥
 करहु क्षमा बासव अपराधा । नाहिं ह्वै याको अब बाधा ॥
 यह शरणागत होत तिहारे । क्षमासिंधु तुम भूप उदारे ॥

श्रवणसहसदश तैं नृप पैहै । तदपिनमोयश सुनत अवैहै ॥

दोहा—पृथुकहँ वासव प्राणप्रिय, मोहि सदा यदुनाथ ।

असकहि वासव कहँमिल्यो, नृप पसारि युगहाथ ८॥
जापर कृपा नाथ तुव होई । तेहि अप्रिय मानै किमि कोई ॥
येक अरज मेरी भगवाना । सो सुनिकै पुनि करहु पयाना ॥
चरणतुलसि मैही अब लैहौ । मातु रमाकहँ मैंनिहँ दैहौ ॥
यह माता सह पुत्र विवादा । रखिहौ तुम्हें नाथ मर्यादा ॥
देखिअलौकिक पृथुकी प्रीती । भे प्रमुदित प्रभु जानि प्रतीती ॥
है सवार तव पाक्षिनाथपर । चलन चह्यो प्रभु चक्र हाथपर ॥
बहुरि परचो पृथु पाँयन जाई । कह्यो नाथ मुहिं लेहु लेवाई ॥
तुमहिपाय संसृत महुँ रहिवो । रत्नपाय पुनि कंकर गहिवो ॥
कह प्रभु चारि संत इतएहैं । महिमा संतन तोहिं सुनैहैं ॥
तोहिं बाकी इतनो अब काजा । मुनिमिलिहैतोहिंसहितसमाजा ॥
असकहि भे हरि अंतर्धाना । पृथुपायो परमोद महाना ॥
बीत्यो कछुक काल यहि भाँती । देखत संत पंथ दिन राती ॥

दोहा—एक समय दिनकर सरिस, द्युति छावत दिशिचारि ॥

आइ गये पृथुके भवन, चारि संत सुखकारि ॥ ९ ॥
देखत पृथु मनु सर्वस पायो । दौरि द्रुतहिं चरणन शिरनायो ॥
चरण धोइ तनु अरु गृहसींच्यो । मनहुँ सकलसिधिउदधिउलीच्यो
करि पूजन षोडश उपचारा । कनकासन संतन बैठारा ॥
चापत चरण कह्यो असवानी । मोहिं मिले अब सारंगपानी ॥
मैं सर्वस निज तुमहिं चढ़ाऊँ । संतसरोज चरण रतिपाऊँ ॥
सनकादिक करि कृपा महाई । संतनकी महिमा सब गाई ॥
बहुरि कह्यो हरिपुर पगुधारो । यह प्रभु शासन चित्तविचारो ॥
असकहि अंतर्हितभे चारी । पृथुकहिचल्यो कृष्णरतिधारी ॥

बदरीवन पहुँच्यो जब जाई । चारि पारषद द्रुत तहँ आई ॥
 पृथुहि चढ़ाय विमान महाना । कृष्णनगर कहँ कियो पयाना ॥
 रमानिवास निवास निवासा । करत भये पृथुसहित हुलासा ॥
 पृथुचरित्र कछु कियो उचारा । और भागवतमें विस्तारा ॥

दोहा- पृथुमहारानी जो रही, सो दहि दहन शरीर ।

भई सिंधुजाकी सखी, छूटि गई भइ पीर ॥ १० ॥

इति श्रीरामरसिकावल्यांसतयुगखंडेचतुश्चत्वारिंशोऽध्यायः ॥ ४४ ॥

अथ गजेंद्र अरु ग्राहकी कथा ॥

दोहा-अब गजेंद्र अरु ग्राहकी, अतिशय कथा अनूप ।

सो विस्तृत भागवतमें, वर्णौ मति अनुरूप ॥ १ ॥

कवित्त-गेरिकै ग्रस्यो है गजराज गोड़ गाढ़यो ग्राह गालिम
 गंभीर नीर चाहै सोगिरायो है ॥ रह्यो नहिं जोर थोर चितयो
 सो चाच्यो वोर काहूके निहोर नहिं जीवन देखायो है ॥ कहै
 रघुराज सो करिंद तजि फंद सब कर अरविंदलै गोविंद गोह
 रायो है ॥ कैधौं करि कहहीते करि करहीते किधौं कमलते
 कमलाको कंत कढ़ि आयो है ॥ १ ॥

दोहा-बाँग्यो मोचन ग्राह गज, भवमोचनहूँ दीन ।

यक याँचत बकसत दुगुन, श्रीयदुनाथ प्रवीन ॥ २ ॥

इति पंचचत्वारिंशोऽध्यायः ॥ ४५ ॥

अथ अंबरीषराजाकी कथा ॥

दोहा-अंबरीष महाराजकी, कहौं कथा अवदात ।

जाहि सुनत सब भक्तके, उर आनंद उमगात ॥ १ ॥

नृप नाभाग तनय गुणवाना । अंबरीष भागवत प्रधाना ॥
 बालहिं ते हरिसेवन प्रीती । बाढ़ी सकल साधुजन रीती ॥

जब नाभाग गयो परलोका । अंवरीप कछु कियो नशोका ॥
 राजतिलक जबतैं नृपपायो । ठौर ठौर अस ख सुनवायो ॥
 जो द्विज साधु ईश नहिं मानी । लही प्रचंड दंड सो प्राणी ॥
 आप कृष्ण मंदिर बनवायो । ताकी रचना विविध करायो ॥
 कृष्ण रुक्मिणी मूरति राखी । सेवन लग्यो नाथ मुखभाखी ॥
 शक्र सरिस वैभव विस्तारा । स्वप्नसरिसनिज कियो विचारा ॥
 जेहि धन मद वश जीवनशाहीं । तासु विकार लग्यो तेहिनाहीं ॥
 पंडितहू यह संपति पाई । लोभ विवश निज देत नशाई ॥
 तासु रंग नहिं लग्यो भुवाला । कारण तासु कहूं यहि काला ॥
 हरि महँ अरु हरि भक्तन माहीं । लख्यो भेद भूपति कछु नाहीं ॥

दोहा—सोइ प्रभाव ते लोठ सम, लख्यो लोभ विस्तार ।

पेख्यो पूरण सकल थल, श्रीवसुदेवकुमार ॥ २ ॥

यदुपतिपद अरविंदन तेरे । चुभ्यो चित्त पुनि फिरयो नफेरे ॥
 रसना कथत कृष्ण गुणगाथा । कियो न और कथा करसाथा ॥
 झारत यदुपति मंदिर मंजू । छाले परे तासु करकंजू ॥
 बिना कृष्ण कीरतिके साने । परे न और वचन नृपकाने ॥
 माधव मूरति काहिं विहाई । अनत भूपकी डीठि न जाई ॥
 परस्यो साधु चरण नृप देहू । ओर परस पायो नहिं केहू ॥
 बिनहरि अरपित सुमन सुगंधू । भयो न तेहि नासा सनबंधू ॥
 कृष्ण निवेदित अन्न अपारा । भूपति प्राण अधार अहारा ॥
 गवनत हरि धामन पद ताके । कबहुँ उपानह सुख नहिं छाके ॥
 छोड़ि येक प्रभु यदुकुल ईशा । द्वितिय देवको नयो न शीशा ॥
 विभव विलास लख्यो नृप जेतो । अरप्यो यदुपति पदमहँ तेतो ॥
 निज शरीर सुख हितनहिं कीन्हो । सकल कृष्णके काजहि चीन्हो ॥

दोहा—साधु चरणमें नेह अति, बाढ़ै जौन उपाव ।

सोइ करनको भूपके, बाढ्यो दून उराव ॥ ३ ॥

अवनिप अंबरीषके ज्ञानी । रहीं परम सुंदर शतरानी ॥
तिनसों कियो न विषय विलासू । हरि सेवत न लह्यो अवकासू ॥
कोउ इक भूपति भयो प्रतीची । बढी विभूति नीति रस सीची ॥
भै हरि भक्ति सुता इक ताके । लागी राम नाम रट जाके ॥
भूप विवाह करन अभिलाष्यो । कन्या वचन जनकसों भाष्यो ॥
वरिहों अंबरीष महाराजै । और भूपसों मोर न काजै ॥
सुता वचन सुनि नृप सुख मानी । परम भाग कन्याकी जानी ॥
कह्यो वचन तैं धन्य कुमारी । अंबरीष पति लियो विचारी ॥
कोउ नहिं अंबरीष सम आजू । सुमति चक्रवर्ती महाराजू ॥
कृष्ण अनन्य उपासक साधू । कृष्ण चरण महँ प्रेम अगाधू ॥
निशिदिन कृष्ण नाम मुख लेही । यही सबन उपदेशहिं देही ॥
साधु विप्र तन मन धन मानै । हरि तजि और देव नहिं जानै ॥

दोहा—असकहि विप्र बोलाय इक, तेहि बुझाय ततकाल ॥

अंबरीष महँ राज पै, पठवायो महिपाल ॥ ४ ॥

अंबरीष पुर द्विजवर आयो । नृपहिं निरखि अति आनँद पायो ॥
भूपति अति आदर तेहि कीन्हों । करि सतकार धोइ पद लीन्हों ॥
करि प्रणाम नृप कह्यो बहोरी । आज्ञा कहा विनय यह मोरी ॥
विप्र कह्यो नृपसुता सोहाई । तुमहिं चहति निज पति नृपराई ॥
तासु मनोरथ पूरण कीजै । अवनिप अनुपम यह यश लीजै ॥
विप्र वचन सुनि कह्यो नरेशा । मोहि न विवाह आश कर लेशा ॥
दिवस रैन महँ नहिं अवकाशू । सेवत प्रभु पद जगत निराशू ॥
हैं घरमें मेरे शत नारी । तेऊ मोहि न कछु सुखकारी ॥
ताते जाहु विप्र घरमाहीं । यह विवाह करिहैं हम नाहीं ॥

यह सुनि विप्र लौटि घर आयो। कन्या कहँ वृत्तांत सुनायो ॥
सुन कन्या बोली अस बैना । द्वितिय कंत करिहौं नहिं मैना ॥
कीतो अंवरीष पति हैहै । प्राण पयान पापकी लैहै ॥

दोहा—यह सुनि कन्याको पिता, मानि परम संदेह ॥

पठवायो द्विजको बहुरि, अंवरीषके गेह ॥ ५ ॥

द्विजवर अंवरीष ढिग आई । बोल्यो वचन बहुत पछिताई ॥
धरणि धुरंधर धर्म अधारा । भयो न तुम सम भूमि भुवारा ॥
पै इक लागत नाथ कलंका । ताते कहो वचन विन शंका ॥
जो लेहो नहिं व्याहि कुमारी । तो तजिहैं जिय आश तिहारी ॥
उक्लण भयो कहिकै अब जाहू । आगे तुव विचार नृपनाहू ॥
कन्या प्राण तजन सुनि काना । भूपति भूरि हृदय भय माना ॥
भन्यो भूप अस जो प्रणताको । तो करिहौं विवाह हठि वाको ॥
मैं हरि सेवन तजि नहिं जैहौं । खड्गनाथके संग पठैहौं ॥
असकहि साजि बरात विशाला । धरि शिविका पठयो करवाला ॥
भयो विवाह खड्ग महँ ताको । दियो विदाकर नृप दुहिताको ॥
अंवरीष मंदिर महँ आई । रानी लही विभूति महाई ॥
जबै दिवस दश पांच व्यतीते । नयन नृपति दरशनते रीते ॥

दोहा—तव पतिको आह्निक सकल, रानी पूंछि तुरंत ।

लागी करन उपाय अस, केहि विधि देखौं कंत ॥ ६ ॥

भूपति चारि दंड निशि बाकी । उठत रहे हरिपद मति छाकी ॥
दंतधावनादिक कर कर्मा । करि स्नान शीघ्र शुभधर्मा ॥
मंदिर झारि बहारत रहेऊ । पार्षद धोइ परमसुख लहेऊ ॥
येकदिवस सो यह सब जानी । पहर निशावाकी उठि रानी ॥
करि स्नान पहिरि शुचि सारी । आई हरिमंदिर धुतिनारी ॥
गए भूप मज्जनहित जवहीं । मंदिर झारन लागी तबहीं ॥

झारि बहारि प्रार्थद धोई । पूजनसाज साजि मुद सोई ॥
 भूपति आगम समय विचारी । रानी तुरत निवास सिधारी ॥
 अंबरीष मंदिर पगुधारो । निरख्यो सकल बहारो झारो ॥
 पूजन साजु सजी सब देखी । नृप उर शंका भई विशेषी ॥
 को भयो हरिसेवन बड़भागी । भागी है मोहिं कियो अभागी ॥
 कछुककाल नृप है संदेही । पुनि हरिसेवन लग्यो सनेही ॥

दोहा—पुनिजबदूसरदिनभयो, नृपतिकरनस्नान ।

कढ़िआयो बाहेरतबै, रानीकियो पयान ॥ ७ ॥

करि हरिसेवन प्रथम समाना । पुनि कीन्हो निजभवनपयाना ॥
 राजा बहुरि तैसही देख्यो । अतिशय अचरज मनमहँलेख्यो ॥
 तीजेवासर निशा व्यतीते । राजा उख्यो पहरत्रय बीते ॥
 रह्यो भवनमें छिपि एक ठाउँ । जनन कह्यो कहियो नहिं नाउँ ॥
 चारिदंड बाकी निशिरानी । आई हरिमंदिर मतिखानी ॥
 लगी पखारन झारन जबहीं । भूपति वचन कह्यो असतवहीं ॥
 कौन होति हरिसेवन भागी । अनुपम भई कृष्ण अनुरागी ॥
 तब करजोरि कही मतिखानी । अहौं नवीन नाथकी रानी ॥
 भई कृष्णसेवन अभिलाषा । मैं मंदिर झारिन करिराखा ॥
 तब बोल्यो भूपति मुसकाई । जो असप्रीति हियेमहँ आई ॥
 तो दूसर मंदिर बनवावो । हरिस्वरूप सुंदर पधरावो ॥
 मेरे कर्म होति कतभागी । होहु अनन्य कृष्ण अनुरागी ॥

दोहा—सुनि प्रीतिमकेवचनतिय, मानिसीखसुखदानि ।

कह्यो करौंगी ऐसही, हैहै बात न आनि ॥ ८ ॥

असकहि लौटि भवनक्रहँ आई । दीन्हो सचिवन हुकुम सुनाई ॥
 हरिमंदिर सुंदर बनवावो । राधारमण स्वरूप मँगावो ॥
 सुनत सचिव तैसहि सबकीन्हो । हरि उत्सव रानी करिलीन्हो ॥

राधा मोहन तहँ पधराई । लैकर बीन प्रेम रस छाई ॥
 गान करन लागी हरि आगे । तनुते कोटिजन्म अवभागे ॥
 रँगी प्रेमरँग सो नृपरानी । तजीलाज अरु उरकुलकानी ॥
 हरिपूजन निशिदिन तेहिजाहीं । सावकाश इक क्षणभर नाही ॥
 बोलि सकल पुरके हलवाई । लगी रचावन टेरि मिठाई ॥
 प्रतिदिन हरिको लागत भोगू । आवैं सकल नगरके लोगू ॥
 पावहि कृष्ण सकल परसादा । गावहि सुयश सहित अहलादा ॥
 पुनि डौंड़ी पुरमहँ पिटवाई । आवै इत पुरजन समुदाई ॥
 जो ऐहैं सो भोजन पैहैं । विमुख कोऊ इतते नहिजैहैं ॥

दोहा—यहसुनिपुरजनदिवसप्रति, हरिदरशनको लैन ।

रानीमंदिर आवहीं, पावहिअतिशयचैन ॥ ९ ॥

असकोउ रह्यो न तेहि पुरमाहीं । रानी भगति भनै जो नाही ॥
 चलत चलत यह बात सुहाई । अंबरीष काननलों आई ॥
 अंबरीष सुन अति सुखपायो । रानी दरशनको ललचायो ॥
 एक दिवस संध्याकी वेला । करि हरिपूजन भूप अकेला ॥
 मंद मंद रानी गृह आये । कह्यो न असद्वारपन सुनाये ॥
 जाइ लख्यो रानी कहँ राजा । बैठी सन्मुख श्रीयदुराजा ॥
 लैकर बीन कृष्ण पद गावै । बारबार दृगवारि बहावै ॥
 प्रेममगननहिं लख्यो नरेशे । अनमिष देखति रूपरमेशे ॥
 रानी दिशा निरखि महिपाला । भयो प्रेमवश तुरतविहाला ॥
 बैद्यो भूप समीप सिधारी । तब रानी नृप ओर निहारी ॥
 भई जोरि कर सन्मुखठाठी । रानी उभै मोद रस बाढी ॥
 भूप कह्यो जो हमको चाहौ । तौ मेरौ . शासन निरवाहौ ॥

दोहा—जैसे गावति प्रथमही, रही सहित अनुराग ।

तैसाहि बीन बजायकै, गावो तुम बड़भाग ॥ १० ॥

लहि शासन पतिको हरिप्यारी। गावनलागी सुरन सुधारी ॥
 यहिविधि तहँ रानी अनु राजा। वितयेनिशि भूल्यो सब काजा ॥
 ब्रह्म मुहूरत जानि नरेशा। आयो निज यदुनाथनिवेशा ॥
 भयो सोर अंतहपुर माहीं। राजा चहत नई तियकाहीं ॥
 कियो सबनते अधिक सुहागा। यह सतरानिन नीक नलागा ॥
 तब सब कीन्हो मनहि विचारा। रीझो जेहि हित कंत हमारा ॥
 हमहूँ सकल करें सोइ कर्मा। दियो ठीक सिगरी यह धर्मा ॥
 लागीं सब मंदिर बनवावन। पृथक् पृथक् प्रभुको पधरावन ॥
 यकते अधिक एक हरि भोगू। कियो लगावन हेतु नियोगू ॥
 मच्यो सोर यह सबथल माहीं। मिलिमिलिसबपुरजन तहँजाहीं ॥
 पुरजनहू लखिकै यह रीती। यथायोग किय हरिपद प्रीती ॥
 यथा योग मंदिर बनवाये। यथा योग ठाकुर पधराये ॥

द्वेहा-राममई ह्वैगो नगर, मिटिगो नरक पयान ।

यकरानी परभावते, भक्ति विभवदरशान ॥ ११ ॥

शतरानी नृप रीझन हेतू। रच्योविमलबहु कृष्णनिकेतू ॥
 पैहरिभक्ति करत सब केरो। भयो हृदय हरिभक्ति उजेरो ॥
 यह हरिभक्ति प्रभाव विचारो। तामें इक इतिहास उचारो ॥
 रह्यो साहु यक इक पुर माहीं। तासु सुता इक रही तहाहीं ॥
 सकल अंग सुंदरि सबभाँती। लख्यो ताहि भंगी यकराती ॥
 कामविवशसो विहवल भयऊ। परचो भवनमहँमनुमरिगयऊ ॥
 देखिदशा पूछ्यो तेहिनारी। भई कौनपति तुमहि विमारी ॥
 कह्यो डोमनहिंरुजमोहिंयेको। जौन रोग सो घटै ननेको ॥
 अहै कछुक नहिं तासु. उपाई। ताते मोरि मीचु नियराई ॥
 तब हठपरी डोमकी नारी। तहाँडोम अस बात उचारी ॥
 देख्यो साहसुताको जबते। भूख प्यास भूली मोहिं तबते ॥

लिख्यो न विधि मिलि वेति हि मोही । प्राण जई विधवापन तोही ॥

दोहा—सुनत डोमति य सोच भरि, काल कौन हू पाइ ॥

साहसुता के कान में, दिय वृत्तांत सुनाइ ॥ १२ ॥

साहसुता सुनिकै करि दाया । कहत भई रचु तैं अस माया ॥

बाहरनगर तोरपति जाई । बैठे रामनाम रटलाई ॥

भोजन पान तजै सबकाला । सोरहोइ पुरमाहिं विशाला ॥

साधुजानि जब पुरजन जैहैं । तब हमहूँ दरशन मिसि ऐहैं ॥

निजपति प्राणदान सुनि सोई । पतिसों कह्यो सकल मुद मोई ॥

सुनत डोम लहि जीवनमूरी । तुरत लगाइ सकल तनु धूरी ॥

पुरवाहिर बैठ्यो इकठामा । रसना रटै रामकर नामा ॥

बीते पाँच सात दिन राती । मच्यो सोर पुरमहँ यहि भाँती ॥

आयो साधु अनूपम एकू । रटै राम भोजन नहिं नेकू ॥

सुनि पुरजन दरशन हित जाहीं । फिरि फिरि इक एक न बतराहीं ॥

साहसुता तब कह्यो पिताको । कहो तो दरश करें हम ताको ॥

साह कह्यो तुम जाहु कुमारी । साधु दरश लीजै सुखकारी ॥

दोहा—साहसुता गमनीतहां, विशद कनात लेवाइ ।

चारिहु वीर लगायकै, कह्यो एकली जाइ ॥ १३ ॥

जाके हित यह स्वाँगवनाई । सोमैं तेरे हित इत आई ॥

अस कहि कीन्हो चरण प्रहारा । डोमतबै नहिं नैन उवारा ॥

प्रथम स्वाँगकरि सो तहँ बैठ्यो । जपत नाम प्रेमांबुधि पैठ्यो ॥

नाम प्रभाव सत्य सो भयऊ । विषय मनोरथ मनमि टिगयऊ ॥

दरशन लग्यो राम कर रूपा । देखि परचो दुख प्रद भव कूपा ॥

देखि मौन तेहि साहकुमारी । मैं वोही पुनि गिरा उचारी ॥

कह्यो डोम तब कन्या पाहीं । तैं वोही पै मैं वह नाहीं ॥

जाहु सुता तुम लौटि निवासा । अब मोहिं राम मिलनकी आसा ॥